

T 3133/3314.81(10)

永平府志

卷之二十

人物後

列女

流寓

方技

仙釋

人物後

蕭山張

李陽

府學

香

成化教

美弗彰

不特關一代之景運

者也

六十八載積累既深文明丕著

永平府志卷之二十

萊陽宋 琬遺次

府學訓導徐 香叅訂

蕭山張朝琮續纂

盧龍教諭胡仁濟校輯

人物後

韓昌黎曰莫為之前雖美弗彰莫為之後雖盛弗傳  
是知後賢之遞起不特關一代之景運實前哲之相  
映而愈輝者也

國朝定鼎六十八載積累既深文明丕著故人才之挺生  
於北平者從



龍昭夾輔之勲擁節豎股肱之績或作干城或稱父母或德行文章可以維風而華國休哉何才之隆歟余職忝刺史愧不與諸君子列而復不能道揚徽烈以爲邦國光是益之愆也故始之以見聞繼之以搜羅終之以考訂後人披覽之餘知

聖世英奇追蹤勝國

興朝聞望媲美漢唐炳炳蔚蔚亦足以光前哲昭來茲矣顧豪傑之生際時彌盛倘克自振興接踵而起此繼輯者之深幸又余所拭目而俟之者矣

國朝孟喬芳字心亭永平人以世胄從

世祖定鼎燕都簡任川陝總督三輔以外實惟憑藉時叛寇

賀珍連賊數萬圍攻西安聲勢震撼公親御敵樓鎮靜無

嘩城中市沽不變若不知有賊者遣總兵陳德軍西門任

珍軍北門突衝賊營斬其驍獍復會援兵合力追擊直抵

永壽斬首萬計公身不解甲日不交睫者七晝夜未嘗言

瘁嗣有河西猖獗之亂兵號百萬朝議將發大師公疏請

以身任督標將星馳秦州密授總兵馬寧張勇等奇策以

精騎五百夜擣賊營悉驚潰遂解鞏昌之圍并恢復五涼

甘肅擒斬米喇印丁國棟等而河西遂平山西姜瓖餘氛  
勢逼太華公奉命疾馳移兵朝邑聲揚航河陰令總兵趙  
光瑞就潼關飛渡一戰復蒲版再戰破陸村三戰平芮絳  
逆魁授首餘黨出降太行以西華岳以東莫不懷德投誠  
會寧夏告警公計連間諜誅擒梟孽而興安之燬永消從  
此嶠函高枕無憂矣總公雄才偉略氣度寬和且能隨材  
任使宥過賞功故士皆樂用所向克敵凡屬吏將校及紳  
士編氓莫不畏威戴德順治十一年卒於官

勅賜祭葬贈太保諡忠毅入祀鄉賢子熊弼襲世職

蔡士英字伯彥號魁吾襲錦州左屯衛千戶明天啓二年  
改入永平衛順治元年從英王征李自成三年從經  
濟王收福建四年陞都察院左僉都御史尋陞左副都御  
史六年征姜瓖克汾州下潞安所向建功秋毫無犯九年  
陞兵部右侍郎巡撫江西時當大亂之後重以災荒公私  
赤立公至請免積逋二百餘萬瑞州府自明初奸民黎伯  
安袁州府自僞將歐祥投冊浮開民糧久爲二郡累且三  
百年來戶口日耗公考求前元故額反覆陳請得減浮糧  
二十餘萬石爲二郡永利初下車值勦叛用兵庫無匝月

之餉廉知州縣解銀苦藩司胥役勒索令解役赴院掛號  
設長牌差押司吏卽日兌收有勒索者立杖斃三人於是  
解者雲集兵得宿飽先公未至撥江南銀十七萬協濟猶  
時告匱公受事未二載解部銀四十餘萬完漕米五十七  
萬八千有奇遂停協濟乃分遣將領擒斬土寇劉京李文  
符烈蘧穎等各郡底定招流民開荒地二萬餘頃買牛築  
室親行區畫且請開山採木江西之民賴以安業復修白  
鹿洞及白鷺鷥湖書院澹臺祠滕王閣薦福寺碑百廢具  
舉士風駸駸振起當大兵克南昌廢紳舊族波累叛黨公  
察其無罪盡釋之其在山澤者以文檄諭之皆出爲平民  
十一年冬陞兵部左侍郎總督漕運兼巡撫鳳陽等郡於  
次年二月下旬抵淮時重運未來回空尙阻公催民舟通  
融接濟凡五閱月畢達京倉在淮二載減兌耗覈盜折正  
身率屬東南依公爲命以疾乞休歸十六年海氛內訌瓜  
儀失守復起公前任時江北大水流民載道公捐俸設法  
散米賑粥全活數十萬人復請蠲淮鳳徐揚四郡銀三萬  
餘兩米麥二千五百餘石期年之間歲稔民和又請復舊  
制分設巡撫駐泰州而公專督漕務尋陞兵部尙書十八

年冬再乞休歸公以至誠感孚特受

簡注故所上無不朝奏夕可抵淮之初嘗以長運滋弊欲倣唐人轉運法分達淮上濟寧德州三倉轉運貯漕盡去長運弁丁歸之官收官運使江船不逾淮淮船不逾濟濟船不逾德德船直抵京倉爲國家無窮利雖事未果行其訐謨實可垂後康熙十三年卒於京

勅賜祭塋謚褒敏勒碑入祀鄉賢四十四年

皇上巡視淮黃追念公輓輸勞績迄今頌法以河干

特書奏績東南扁額以賜子四長毓貴早世次毓榮雲貴

總督加綬遠將軍次毓華遵義知府季毓茂京口副都統毓秀其猶子也亦以公廕任永寧知州孫十四貴子瑋原任慶陽知府榮子琳原任內廷職事食主事俸珣原任海塩知縣璣璵璠璣璣未仕華子珍舉人原任監察御史琦候補按察使茂子瑜良俱官叅領湘未仕楊文魁號近樓永平衛人國初以副將從征宣力屢立戰功擢工部左侍郎凡條議時務精練豁達前奉差監修奉天諸

陵寢樓櫓橋樑暨寺塔大砲諸工俱先勞鼓舞勞績懋著

劉良臣字心伯永平衛世襲以軍功授遊擊勦平流寇歷陞甘肅總兵掛平羌將軍印卒於陣贈右都督進光祿大夫子澤洪總兵襲廕

崔尚樸盧龍庠生被俘至遼改姓名李嘉賓應試復入庠國初授新蔡尹清廉慈愛邑人尸祝陞南康郡守遇金王之變鳩衆堅守城守守備內叛遂被執罵賊求死不得偕配吳氏投環死事定議贈廕惜無子

呂鳴夏字九三山海衛人明萬曆乙卯舉人天性孝友弟鳴雲歿於王事遺孤幼呱撫訓成立婚娶遊庠輿論重之

初仕清豐諭補束鹿訓課有方陞真定郡丞分駐宣鎮以抗直取忤掛冠歸里明末賊逼關門時公家居佐義殲寇錄功補衛輝郡守時天下初定撫安百姓政績稱最擢僉憲備兵固原值降將武大定等謀叛以兵脅公不少屈歷數其罪罵不絕口遂遇害事聞

勅賜祭葬贈光祿卿廕入祀鄉賢

呂鳴章字太呂山海世胄嘗遵父命讓爵與弟順母心讓產與弟以官廕子侄又爲亡侄立嗣其孝友如此以明經筮許州判官當事重其才任以撫寇深入壘巢能不辱命



比旋寇叛躬率家丁巷戰力保危城百姓尸祝之尋遷京  
秩以內艱歸甲申革命佐舉義旅大戰石河努力殲寇錄  
功補戶曹郎歷陝西道叅議以忤過客致政歸家居二十  
年問耕課讀清素自甘子燦如由貢歷黃陂宰

曹時敏字捷音山海庠廩生順治元年錄功授鄉寧令改  
補靈璧性倜儻多材藝長才卓識藻鑑超人

穆齊英字羽宸山海衛人由貢監順治元年授商城縣丞  
以子貴封奉政大夫生平敦義讓重然諾望重鄉邦子三  
長爾謨登丁亥進士歷萊郡守

馮祥聘山海衛人順治元年錄功授齊河令陞長沙郡丞  
事孀母曲承養志教及門善誘成材叅贊宣勞循良著績  
齊河建有專祠

卜昌運字泰寰東勝衛人文行卓犖豐潤董氏延爲師彼  
族惡少獲罪董夜持金乞援公力卻解之董御僕嚴一奴  
負愆懼責以銚刀自斷其首奴家訟金吾戚友皆避去公  
走京師力爲昭雪友人韓鼎業邁家難漁利者啓釁不已  
公挽鼎業哭韓氏家廟中曰吾不意子豪傑自命竟爾爾  
耶韓慚謝兄弟和好如初順治二年貢除南宮訓遷東光

諭群盜猝犯城公率家僮登陴奮呼隸卒駁擊渠魁城賴以全擢知江都縣卒于官

馬維熙字天御山海衛人由拔貢順治三年錄功授忻州同知署偏關西糧廳篆值姜瓖之變山右一帶搖動偏關闔城皆從逆公獨不屈乃圍公別所遣人守伺久之守義愈堅遂加害事聞贈忸州知州

劉光裕號小峰遷安人居鄉樂施尙義慈愛謙恭撫孤侄嫁族女助喪賑饑盛德積累鄉人號之曰劉佛以子鴻儒貴贈兵部右侍郎入祀鄉賢

劉鴻儒字魯一號澹逸遷安人登順治丙戌進士初授兵科給事中時當改革吏胥爲奸賦無定額公首疏請頒賦制以甦民困略云臣遷安人也目擊遷安正供之外派擾滋甚推之一縣如此則一郡可知一郡如此則合省可知合省如此則天下可知于是罪責郡縣苛政乃除里民至今德之尋遷戶科疏論三事不應圈占民地爲禁旅莊田不應抑勒平民爲投充人戶又逃人之禁太嚴窩主坐以大辟宜減從輕皆同列所不敢言者咸危公公不爲動賴諸大臣救免疏得留中旋以糾鉅鹿縣某謫上林苑蕃育

署署丞以憂歸已而

詔三事悉如公疏

特旨以原官起補兵科益感激圖報簡無虛白遷戶科都給事中疏陳京東鹽法語尤切直同列者復危之公意氣自若陞順天府丞左通政太常卿通政使歷兵部右侍郎戶部左右侍郎擢都察院左都御史密疏請免江南逋賦及疏論封疆大臣不宜拘以文法爲給事中成性所劾部議鑄二級調用遂拂衣歸里杖履優游日往來于黃台三嶺間晚年益好吟咏工書法復究心濂洛關閩之旨生平不屑治生祿賜之餘周及宗黨顯要三十年惟圖書自娛蕭然寒素卒年八十有一所著有四留堂集行世

石申字仲生灤州人明副使維嶽公子登順治丙戌進士選庶吉士館試屢膺第一視學江南搜拔孤寒所取士多掄大魁歷遷學士經筵久資啓沃擢吏部左侍郎矢公無欲門絕苞苴以抗中忌奪職後事定起補刑部左侍郎上慎刑疏天下傳誦丁繼母艱服闋補戶部左侍郎總督倉場舊例厨饌交際取資斗級衙僮藉恣吞啗公一切罷去綜核無遺釐清夙弊值慈母計聞歸里嬰疾而卒

勅賜祭葬

李成性遷安人登順治丙戌進士任新城令撫綏殘邑克著循聲未幾乞休歸隱居山莊讀書嗜古老年弗倦鄉人推爲理學先型

蕭竒楹撫寧人總戎蕭陞孫任臨清叅將居官數載持身冰蘖林居食貧無所干謁鄉黨重之

崔聯芳字子宗山海衛人父出遊五年不歸順治丙戌應順天鄉試榜未發聞父凶信不知死所日夜號哭幾不欲生比揭曉已膺鄉薦不顧歷四省尋屍若有神示於河南確山縣得之負骨歸葬咸稱爲誠孝所感兩經部選高隱不仕年八十三卒

劉克孔字扶宇山海衛人由拔貢順治三年授平度州佐遷温州通判歷六安知州潞安同知所在有治聲去後咸歌思不忘康熙初陞汾州知府愛民禮士聽斷如神治汾十年考績稱最晉三品秩

奈一元字占一號潛滄山海衛人登順治丁亥進士初授刑部主事遷禮部歷儀制司正郎冰蘖矢操端方謹飭時以清正稱加從四品告疾還里閉戶著書屢徵不起立社

講學啓迪後進從不干謁有司若事關學校及地方興除  
大務必力爲救正遠近倚爲師表所著有潛滄文集八卷  
重修山海關誌

胡來相號玉衡永平人事親孝謹居恒言動每以古人自  
期順治四年筮仕元城令時萑苻未息大河以北騷然煽  
動天雄爲畿省要地公矜撫流亡人心賴以寧固且開諭  
恩信賊相繼降附以卓異擢山西道監察御史有謇諤聲  
巡按湖南首以除盜爲已任區畫戰守動中機宜尋掌河  
南道陞太常寺少卿卒於官于三祝歷河南南道御史

管聲揚字鳴鑾號龍崗明崇禎己卯舉人國初任常州水  
利通判操守清廉職務勤慎釐整鹽法清理糧務築堤濬  
塘大興水利丁內艱服闋三院交章題薦以疾辭士論高  
之子鞏祚邑庠生謹厚尙義孫三伯季俱庠生仲名標康  
熙丙子舉人

高顯辰字欽思灤州人順治戊子舉人授德安令擢補南  
寧郡丞陞雲南守時吳藩赫奕麾下虐民輒移文該管諷  
刺之或途值卽面叱其非上官同僚每勸勿撻其怒應曰  
吾輩

天子之吏何可詭隨異姓王之帳下兒耶卒以是得禍當吳  
逆之變也逼司府入欲授偽職公抗詞薏拒幾斃杖下遂  
放於北洱自此絕音耗後有自逆中歸正者言當放時公  
配戈氏已自經賴同官某收殮之又傳公於巳午間病卒  
亦其人合殮二子不祿僅二女其次適滇臬李公興元子  
毓秀隨公滇任李同時受禍更慘其家亦不可問矣

崔維嶸字嵐峯明甲子舉人啓亨公子年十四被俘至遼  
太宗簡視俘獲知爲啓亨子曰是求死不作知州人子乎勉  
事吾勿辱汝父也順治五年以貢授清豐令時 畿輔盜

賊未靖躬率親屬戰捕殲渠魁釋脅從豐邑遂安陞興安  
知州招集逃亡貸粟勸墾期年民用輯寧因防兵擾民公  
執法繩之與守將忤竟鐫級歸遂絕意仕進在廷故舊招  
之不往晚年廬於漆西先塋者九年鶉衣糲食惟一蠢僕  
傭日以給每晨起哭拜母墓手掬土培塚植木四週子廷  
瑜中康熙癸卯舉人任全州刺史解組歸迎養玉田堅不  
允所奉悉揮却之後廷瑜浼郡守梁公世勲慫勸就養因  
屬盧令訪之見癯然老叟問此有廬墓崔太翁否公對曰  
身卽崔姓念少失父母髦年無所爲故待死故丘欲附塋

墓傍耳廬墓之名曷敢當令爲感動因坐土室接談移晷見其語語至性竟不能致意而歸年八十有六卒

房星燁字肫如永平人順治五年貢授睢州牧興利除害不畏權勢陞漳州知府耆民爭相肩輿泣送數十里其治漳設隄防嚴城守閩南倚爲保障

張鍾英號瑞峯其先遼東義州衛人以父玳於天啓時司諭盧庠遂家永平公由順治五年貢筮定陶令甫下車土賊糾衆圍城公率衆堵剿射中賊渠餘黨悉平於是除蕪招流離重賓興復鄉飲治行稱最陞黃河同知去陶日

士民鑄石德之癸巳河溢堤決石香爐富家集南北一帶居民漂沒公住守河干多方築節物力恤夫役民之居者役者胥賴安全陞福州知府以修河積勞未任致仕

趙映斗遷安人登順治己丑進士任吳堡令邑殘民貧加意撫綏不事紛擾因呈誤鑄級事白補馬邑廉能有聲

翟鳳翥字儀軒廬龍人少孤力學素履端方燕居雖盛暑必冠以明經司訓平山見學宮傾圮竭力倡修年七十餘予告歸猶披覽經史弗輟子二長儁次任俱庠生任幼失恃事繼母以孝聞父喪哀毀盡禮生平盛德尙義咸以長

厚稱孫正經康熙癸酉舉人

張星煌字斗輝盧龍人由拔貢以通判改授襄陽衛經歷代篆宜安及均州事治政明決督撫漕三院薦最陞東昌同知冰蘖矢操代州事呈誤四里與同志講學問字食貧不怨溫良之度人樂近焉

崔魏字嶽生號坦菴盧龍人幼孤崇禎庚午郡城陷母王氏度不能免亦自經依兄嫂避難兄嫂利其產百計死之賴母叔王如梅密收養之王業農弗令就學年逾冠里胥欲派以倉役公恥之遂發憤力學入遷安庠後益自攻苦遍涉經史繭足走京師受春秋于歸安尹平之先生領順治丁酉鄉薦就武邑諭修學舍課生徒鐸聲丕振公留心

理學議論一宗紫陽時講學者多排詆陽明公曰致知之學孔子孟真宗且陽明先生直諫勤王功在社稷真以身講學者若隨俗以異端斥之不但得罪陽明亦紫陽所不許也壬子夏遇容城孫夫子高第弟子魏蓮陸相與議論知孫夫子之學欲用朱以救王學之虛用王以疏朱學之實總期于深造自得遂遙爲納贄期秋盡率門弟子遊百泉面相質證忽遘疾卒年四十八子三長璠拔貢次璵庠廩



生季璨翰林院庶吉士

房星煥字皓如永平人由籌海功順治十五年授南康通判壤接湖山萑苻時發公下車卽捐俸修理城濠設礮砲立旗幟盜跡遠遁以才能調兗州泃河通判修舉廢墜百姓勒石紀德尋陞武德道副使卒於官

張師聖遷安人讀書善騎射以將才任金吾守備陞靖海叅將簡練軍士整飭防汛數年海上肅清順治中陞山東登州副總兵未離任海寇旋發督撫令將兵進討沒於陣

詔蔭卹

汪淑問字清公號邁陶東勝衛人幼失怙恃事祖父母孝謹承志嘗履險曲全叔事以妥祖心登順治己亥進士筮捷爲令邑當草創居民僅六七家公竭慮撫綏增井安民著有實效未幾以望誤解組士民擁馬首號哭失聲生平篤交誼宦蜀時貧苦不能自存猶解俸以急友難客武昌幕力贊開死罪存留養親之例迄今永著爲令山左郡縣感公默全之德多尸祝之居鄉謙厚古道爲一郡典型者垂五十年數舉鄉賓所著詩文集若干卷藏於家壽八十有五卒子三長與臨次與賁俱庠廩生季與恒康熙庚辰

永平府志  
卷之二十一  
科進士

王簡字咸一號莘雲撫寧人由恩貢任莊浪令服官清正綽有能聲退歸林下澹泊安常志期超卓時皆欽重之

馮泰運字義軒撫寧人由貢士任溧水令吏治精敏嘗捐貲二百餘金助修撫寧學宮及製銅冶祭器二百餘件以光春秋祀典

朱爾怡字昆和明己丑進士文運公曾孫父鼎嘗舉德行怡府庠生改奉天中順治庚子舉人三任廣文鐸聲丕振陞沂水令任事百日緩征恤民歡呼載道值水災致仕時年八十有六一堂四世寬和任恤宗黨以古君子稱焉

李煒然字含醇盧龍人由貢生以州同改授江川知縣邑數罹兵燹百姓流亡公發粟招徠多方安輯以上司變解任士民鑄石德之

宋國賓遷安人由恩貢筮隆德令剛方果斷卓有政聲家居讀書山莊人重其品

馮隆運字明軒撫寧人由貢士筮長山令慷慨明斷士民欽服及還里篤友愛崇信義解紛周急鄉黨稱之

蔡毓榮號仁菴襄敏公仲子誕有異徵弱冠授佐領選刑

部河南司正郎順治十七年隨征楚寇又調征鄭國信海氛既靖紳士多羅僞籍公矜釋甚衆還部會科場吏議下西曹牽引者賴公得白有兄弟爭玉竿待質公動其天性氣俱平卽以玉竿壽弗受二人感泣以玉竿碎訟庭石遇宦者橫於市公執而撻之宦者訴

世祖前問狀公俯對曰臣何敢撻宦者撻虐民犯法人耳

世祖顏頓霽仍以宦者令公加責聲振長安晉京畿道御史裴敏公居總憲峙樹風節公繼之行避驄馬時稱爲大小繡衣晉內秘書院學士歷刑部左右侍郎康熙六年

覃恩封光祿大夫七年晉吏部左侍郎澄清銓政多所建白向舉人下第祇授教職公闢正途上揀選知縣之議迄今垂爲令典九年總督川湖

上親解袍賜著體猶溫不匝月泄荆渡漢巡蜀振綱肅紀薦賢抨墨措兩省事如在眉睫十二年吳逆逼荆江公悉力守禦一夜鬚髮盡白兼攝提撫兩印務十七年四月出洞庭湖十八年正月開岳陽

詔命爲綏遠將軍統率各省官兵相度地勢惟辰龍一關踞立巉巖飛鳥難越獲賊間謀四給劄賞金分用爲嚮四面

夾擊公直衝正關捫蘿攀壁奮登破賊乘勢入黔師次貴陽賊焚鐵索橋公卽飛渡仰擊二十年二月師次安南且勦且撫諸郡歸順直抵滇海出奇疾擊賊幾盡賊鼠竄孤城倚滇池汨活澎濞師難猝渡公占要害圍作檄射城令擒逆首圖自新城中感激門洞開斬渠魁謀主餘黨潰散衆議欲屠之公不可遂不血刃雲南平卽

命總督雲貴軍務先是襄敏公卒於京

上恐傷公心誠勿計踰年始知痛哭幾絕請守制不許未幾元配閔夫人亦卒公總不以私事分殺敵心及恢復上疏辭印

上以巖疆甫定留撫綏二十五年移總督倉場尋轉兵部左侍郎平南之役公賴

廟算如神兼 諸王大臣同心戮力以致奏凱計功論過難答

高厚遣黑龍江親串悲行路公曰炎風朔雪同在光天化日之下我躬擐甲胄出萬死中甘之如飴豈以道路憂至遷所十年身親戍役稍暇閱經史講忠孝大義時羅刹跳梁兩次隨征三十五年

賜環歸里猶在軍前効力馳驅兩載三十七年十一月  
聖駕東巡回跪迎道左蒙

聖恩垂問年齒三十八年正月偶得疾呼家人囑曰我生多  
愧汝輩上念世澤倘有寸進必捐糜踵頂以報

國恩捩髮端坐而卒

孟熊臣字輔昌永平人忠毅公猶子由蔭生初知保德州  
治政明恕不事敲朴嘗稱貸二千餘金代民償逋秩滿陞  
汀州郡守時海氛未靖軍務繁興汀屬不困于粟米力役  
者咸公申請有方力也順治十八年攝漳南巡道篆奉令

突插海兵星馳詣杭請於東郊造營房以居之又具詳家  
口糧額俾不病民至今杭民德之家居謙和謹厚縉紳家  
稱由禮者以公爲最云

王可就字向明灤州人以將材任山東撫標遊擊勦巨盜  
王進周撥宣等又撫賊張正等數萬人以功陞延安府叅  
將值逆賊謝化竒等作亂設計勦平陞慶陽府東協副將  
閣部洪經略題調恢復雲貴鎮守偏橋其地有諸葛洞者  
江中多怪石舟楫不能通軍需皆民丁負運因召父老叩  
狀僉曰中有巨石高數丈石下有洞讖云若要此洞開除

非諸葛來自昔畏難輒止公慨然力任募石工勇慧者親  
爲經理巨石下得一碣有丁口京邊九十公之語乃武侯  
筆隱公姓名於中衆皆踴躍數旬成功土人勒石紀之以  
功陞杭州城守副將先是杭多猾賊素賄當道不肖者復  
左袒賊公與賊唐起凡戰敗之兵道某反謂誤入平民爲  
盜因與抗論事白督撫遂專任公起凡密遣賄說公不出  
戰願代爲負緣得總戎公怒曰逆賊視我爲何如人哉誓  
必滅此朝食于是元旦會兵圍其岩親登手刃之餘黨降  
起凡兵稱百萬爲杭害者幾二十年至是始平

上嘉其功加陞榮祿大夫署都督同知賜蟒玉封三代任杭  
時總督被江賊劫所佩刀急召與議公獻策阻塞沿江便  
路置塘戍守率兵嚴捕江賊遂平尋陞福建副總兵以都  
督同知署總督標下中營事詣闕陞見

上親臨試射授雲南臨元澂江等處總兵官時吳逆變作復  
召見賜綵緞二表裏且諭曰可速回閩密察耿藩恐效尤吳  
逆也遂星馳踰仙霞嶺尚不知耿逆之變逆密遣四僞官  
要於途日夜嚴防不容死既至圖乘間誅逆謀洩迫趨都  
尉府度不能免仰天嘆曰大丈夫不能爲國除賊夫復何

言舉家號泣隨之不顧遂遇害年六十二

上憫其忠賜祭廕二子長應麟任榮昌令次應馬性至孝以母老不仕居鄉任義周恤於公歿後四年卒廬妻趙氏甫二十二歲事姑甚謹泣語家入曰吾上有七十歲老姑下有不更人事幼子慮不能承歡憂勞成疾不數月亦亡喻成龍字武功其祖父從

龍定鼎入籍灤州公弱冠以恩廕任江南建德令廉明仁愛膺卓薦值吳耿叛時公雖離任撫軍壯公才略分兵協勦親冒矢石所向披靡獲從逆姓氏簿卽付祖龍保全實多士民不忘遺愛勒碑塑像迄今蘭臺山猶尸祝焉題授池州郡丞督軍需赴荆岳勞績茂著卽題授本郡守當軍興旁午督造戰船刻無寧晷公猶加意民食所屬各建義倉積穀民樂輸至數十萬石不報上司無掣肘遇歉分給民不苦飢剏建書院禮請學博置學田積藏書暇則與生童討論俾從事經濟實學池於江南爲小郡一時彬彬稱極盛焉丁內艱去池補江右臨江府地瘠民貧公撫字噢咻循聲大振擢山東漕運轉臬藩連任山左俱有治績適遼東歉收議令撫軍由海運粟濟荒

詔特委公載糧百艘星發海若効靈不揚波者數月活遼民  
萬億一歲之內晉月卿廷尉少司空三遷顯秩人皆以爲  
榮公悚惕益甚乙亥歲北鄙跳梁復

詔公運糧兩經大漠直窮西海軍食未嘗稍缺叙功轉少司  
馬奉

命看河敷陳無不報可因發帑修築同事九人凡所建豎多  
出公裁漕運賴之覆

命顧問諄諄條對悉當

簡總督湖廣隨

駕南巡

恩賜華袞扁對詩章字帖等寶甚夥甫蒞任會征紅苗勦除  
十餘寨撫綏五百餘寨恩威互施楚地以寧解組歸灤闔  
門養望以讀書吟咏自娛有詩集行世嘗見許於王阮亭  
諸辭伯君子以行藏無愧稱公云

穆廷栻字符公山海衛人康熙丁未科武進士初任蔚州  
守備陞四川提標遊擊整飭營伍愛恤士卒川陝提撫咸  
以才勇保舉膺卓薦擢威茂營叅將永寧協副將

特授蘓松水師總兵屢覲



天顏備邀

聖眷扁書衣食

寵賜甚多公性情謙和操持謹慎自始仕迄今令聞遠播綽有古儒將風

韓坤業字子厚府庠生父原潔崇禎庚午歿於兵燹母王氏苦節四十年撫坤成立自幼事母盡孝內外無間言母歿廬墓三年哀感行路日手抔土迄今高塚巍然康熙九年題旌建坊

徐從新撫寧庠生母性嚴從新稟遵承順生平任俠急公人服其義本縣扁旌其門

徐進孝撫寧人父患心疾貧不能延醫禱神許愿疾愈愿莫償疾復作進孝割胸前肉如掌禱還神愿疾竟瘳以肉掛廟樹上經數月不腐鷹鳥亦不忍食咸謂至孝所感有司表其閭

陳柱國盧龍人康熙十一年任樂亭駐防把總盜伺縣尹公出詐爲行客入城肆劫柱國挺身與鬪中流矢被獲縛令導引柱國裂眦厲罵遂遇害事聞

詔賜銀百兩襄葬事

蔡珍字左才襄敏公孫遵義守毓華公長子康熙壬子舉人授中書舍人陞典籍轉寧武關同知勤慎練達治績著聞秩滿遷督部員外郎補禮部陞工部郎中剔歷曹署守正不阿擢監察御史風裁審諤直聲丕振

張翰宸昌黎人以明經任翁源令多惠政擢長沙郡守潔已率屬治政廉明聽斷活無辜九人獄無冤滯致政歸捐資課廸後進值歲歉煮粥賑貸待舉火者不下千百家邑人感之請祀鄉賢

劉偉字遠公灤州人幼嗜學性倜儻不羈父冑泰以明經司諭定興公省侍克承庭訓爲文博雅堅勁康熙乙卯韓慕廬先生主順天鄉試闈中得公卷大加欣賞定第一行稿出傳誦遍天下數困公車益自奮勵乙丑捷南宮選庶吉士丁卯授監察御史巡視東城風裁高峻聲著臺班卒於官遺橐蕭然足徵操履之潔清矣

張宏字宥涵昌黎人由選拔初任肅寧教諭課士勵行不振鐸聲遷知新昌縣潔已愛民實心敷政革除日用米燭及里長更役陋規修學課士勸農墾荒徵收不取耗餘弭盜力行保甲剖決疑獄咸服如神蒞新五載兼攝嶧篆清

正慈祥始終一致已列薦舉忽疾卒士民哀慕崇祀新邑  
名宦子四蕢夔著俱庠廩生蔚康熙乙酉舉人

劉從性撫寧人性至孝母年八十二臥病不起性割股禱  
神病遂愈草野愚民可謂終身孺慕者矣

高培昌黎歲貢純功遂養屢試冠軍教誨生徒不干世務  
子二長天曉恩貢仲天挺康熙甲戌科進士初任臨淮令  
克著循聲贈父文林郎今補隆昌

趙名元撫寧庠生母卒廬於墓側晨昏哭奠三年始歸康  
熙二十年奉旌

姚延嗣字振公樂亭庠生天性孝友睦族撫孤多藉成立  
遇貧乏不能婚葬者周助從無德色樂邑學宮頽壞公於  
康熙甲辰年首先倡修殿廡一新又奎樓久廢力勸建之  
生平樂善好義類如此子采以選拔任國子監學正

詔贈公如其官康熙二十九年奉文崇祀鄉賢

倫品卓字宣明灤州庠生性倜儻不羈以選拔筮仕江西  
南康倅治有循聲康熙辛亥南康大饑公貸請帑金三千  
兩買運減糶康人賴之康地處下流舊制米交漕運舟多  
漂溺若上倉發兌靡費不支公力請督漕以康米竟達京

口著爲例至今稱善壬子押運力除私折盜賣諸弊先期抵通倉漕合疏薦舉值康守乏卽擢典匡郡公重士保赤習俗丕變重修白鹿書院郡學講堂甲寅冬饒賊逼城守兵寥寥公激勸鄉練乞援會勦日戰三捷殲渠獻馘

上嘉其功勅部議叙會丁外憂以金革奪情復計撫僞官百二十餘名僞兵七千餘人餘孽悉平無何失意重臣遂解組歸徜徉詩酒壽至八十有五卒子三長可久任陝西慶陽府同知仲可大任山西澤州知州季可經府庠貢士

張霖字汝作撫寧人幼孤嗜學弱冠遊庠由貢生任工部營繕司主事以母老告歸顏其堂曰愛日色養曲至宅憂哀毀盡禮起復補原曹尋陞陝西驛傳道

上念陝爲巖疆欲增置道員難其人廷臣交薦公

制報可時陝饑民多流亡公設法捐賑全活甚衆遷江南上江按察使治獄多平反會皖江兵冗議裁軍士洵洵譁當事門公推誠諭慰遂輯論者謂非公事且不測遷福建布政使舊錢糧解藩有羨耗陋規公悉除之生平慷慨樂解推待舉火者不下千百家尤喜爲詩古文詞與四方知名士唱酬無虛日加意桑梓人文於邑學宮旁創義塾十餘

間祖仲科父希穩以公貴

誥封光祿大夫子增候補光祿寺典簿坦堦俱康熙癸酉舉人堦任中書科中書舍人坦候補光祿寺寺丞堦候補主事

遲震起字茂先昌黎人少食貧事親以孝聞居喪哀毀骨立後入太學 恩例應除翰林僚屬性恬退不喜仕進生平謙和樂善從無疾言遽色宗黨咸以長者稱之子二長日旭初宰浙江浦江嗣宰湖廣黃梅遵庭訓克著循聲次日昶歲貢生公以昶任浦江 封文林郎

高颺昌黎歲貢操行耿介教子義方子三棠芾棠萼棠蔭伯季庠廩生仲登康熙己丑科進士

王監字于隰灤州人性嚴重不苟嘖笑生平重然諾樂獎後進而尤敦族誼凡婚喪藥餌棺物及急難事施濟難更僕數於孝義節烈更加意曲成與人交不以生死變易年八十卒進士汪公淑問爲著考終錄事甚悉子四伯仲早世次代出繼季遂功府庠生

倫可大字子受灤州人髫年爲諸生隨父品卓之南康任適滇黔逆警左右其父於軍前屢建勞績寇平父爲大吏

誣劾公奔走幹旋事遂白初任西蜀新津令當蹂躪後邑無城郭祇穴處二十餘家公斬荆棘招流亡墾荒除賦五年生聚轉瘡痍於衽席薦陞粵東化州牧其被兵與津等積十三年未完逋課紳衿咸遭繫辱公概與寬釋致鑄十五級甘之如飴而逋亦竟蘇丁內艱服闋補山右澤州杜絕苞苴革除陋弊時有齟齬以白金三千賄卽白上司奉有加級

優旨 在澤十年手著濩澤政紀可垂治譜會私鹽被巡役殺死梟民憤激構禍公與叅戎率兵往視梟民疑商人買囑兵弁聚衆對壘叅戎卽欲屠戮公以蚩蚩愚頑不忍血刃力爲抗阻因單騎親入痛哭陳諭梟民感泣羅拜旋卽解散無知得免羅織遂干呈謾去澤之日民扶老攜幼攀轅號泣建立生祠公歸里後州人屆公誕辰必聚會稱祝至今弗衰後聞公歿於家遠近老穉匍匐赴祠號奠者旬日其德澤深入人心如此大學士澤州陳公廷敬親悉善政誌其墓

張應宿昌黎貢生長沙郡守翰宸公子性慷慨重然諾恤貧周急毫無德色舉鄉飲賓

崔璨字淡餘號茗菊武邑學博巍季子五歲孤九歲五經成誦康熙癸酉中副車貢入成均己卯鄉舉第四魁麟經已丑成進士選庶吉士性恬靜篤孝友事母色養備至嚴事兩兄長兄性剛怒責卽長跽以請非怒解不敢起自童子至庶常皆然生平無疾言遽色雖貴益自謙抑善詩古文詞著有式好堂集藏於家年四十三忽遘疾卒於官徐進禮字天一山海衛人賦性醇樸少貧以勤儉力自振興與人交忠信和易尤篤友愛兩弟早世遺孤穉齡撫翼教誨迄今二十餘年同居無間今年及七旬列名國學未嘗一至公庭有古君子風

謝丕智字若愚山海衛人府庠生事親誠孝母病湯藥親嘗衣不解帶者兩月病轉劇乃焚香虔禱割股投藥母遂痊康熙三十二年學校鄉隣公舉孝行郡守梁公世勲旌其門

李毓元字儲英灤州人慷慨尚義一諾千金家設義塾以訓族子歲解私橐以周親知急公排難之舉不可勝紀康熙四十二年出粟一千石賑濟復捐助義倉五百石大學士安溪李公光地撫直時匾旌曰社儲倡義子楨綽有父

風

吳元臣山海衛人性至孝母病危篤醫藥罔效乃焚香叩天剖股投藥母遂痊康熙四十二年公舉孝行有司旌之夏曰瑚灤州庠生父輔明於崇禎九年隨叔建中之扶風縣佐任死於流寇家人負骸骨歸瑚甫五歲賴母聶氏苦節撫訓遊庠自幼事母曲盡孝道母病密爲嘗糞及歿哀毀逾常七日不食竭蹶殯葬廬於母側日夜哭泣哀感行路及三年歸猶日三至墓呼母不應號泣而反至老病必扶策往雖風雨無間

穆維乾字介公號圭炎天性孝友學問淵博領順治乙酉鄉薦司諭滑庠及遷保定左衛教授整飭學規精勤課士嘗攝滿城邑篆值旱荒設法賑濟全活甚衆撫臺金公疏薦云行同濂洛關閩才類韓柳歐蘇真實錄也陞翰林院典簿時修四書滿漢講意至羔裘元冠不以弔掌院葉公方藹爲犯

聖諱商於同僚俱不能對公曰大字仍原字以尊經小註改元字以避諱掌院詢何所本公曰中庸慎獨乃原字小註改謹字掌院大悟云余自幼疑此今始知朱子爲避諱也



深加敬禮歸休林下講學論道誘迪後輩殷殷不倦生平廉節自持不慕權勢自筮仕及卒五十餘年鄉望特隆張宗仕灤州人幼失怙事母盡孝及長喜讀孫吳書任俠好施明崇禎時從兵備張公春軍中屢戰有奇功授明威將軍順治壬辰癸巳間歲頻饑兩次輸粟一千八百石有奇賑濟賴全活者無筭郡守旌其門曰惠溥一方舉鄉賓又嘗捐渡船二隻水手四人置青沱河口以濟行人遠近咸感其德子起鯉任河防州同知孫瑛食餼州庠孝慈接武咸謂積德之遺云

田毓琦字瑞生昌黎人性孝友具才幹家貧力勤貿易生計漸饒事父母養生送死及兄弟子姪衣食婚嫁咸身任之嘗商於薊之上倉時河水氾溢堤將潰公出貲募夫塞堤得免水患所保全者不下數千家居恒尚義周恤延師課讀子永乾康熙戊子舉人

張朝臣字鼎翌山海衛武進士任浙江處州協都司康熙四十七年遂昌縣土賊作亂公率兵赴勦至大拓地方山路左係樹林右礮下盡屬山田崖高路窄僅容一騎公不避危險奮勇身先殺賊被戮死事聞

詔贈都司僉事加一級賜祭塋廕一子衛千總

王嗣昌字祖生廬龍庠生九歲失恃賴繼母陳氏撫育昌事之極盡其孝生平謙厚恬退課子義方子五長珍康熙丙戌進士瑜孝協力田仲季俱庠生

永平府志卷之二十一終

永平府志卷之二十一

萊陽宋 琬撰次 府學訓導徐 香叅訂

蕭山張朝琮續纂 廬龍教諭胡仁濟校輯

列女

閨門為治化之原故二南必首關雎主持世教者體宣尼刪詩之意大移易風俗之權則列女之不可不傳也審矣顧女有四德斷取諸貞其中冰霜勵節金玉守身多有能為男子之所不能為觀於斯而世之號為偉丈夫者反宜對之而增慙焉又不止為閨門

訓已北平爲

京畿東輔化行自近代堪紀者實不乏人余承乏是郡責  
在表彰寧忍僻壤幽貞窮簷苦節竟與草木同腐爰  
極意採訪分屬而臚列之見

聖世化行俗美德被帷房彤管所垂婺耀千古嗟乎夷光  
生於苧蘿王嬙出自姊歸未嘗不足爲其地誇艷奚  
如黃絹之碑永著曹江綠珠之井遺麗合浦耶

盧龍

元王宗仁妻宋氏進士宋襲之女也宗仁家永平兵亂偕  
氏避於鑊子山夫婦爲軍所擄行至玉田有窺氏色美欲  
害宗仁者氏顧謂夫曰我不幸至此必不以身累君遂攜  
一女投井死時年二十九

明崔氏永平衛贈鎮撫楊成妻年二十六夫亡二子興旺  
在抱紡績自活宣德三年旌表

李氏呂文秀妻年二十二夫亡遺孤在哺亦殤氏以鍼工  
自給天順八年旌表

杜氏庠生李達妻侍郎謙之姊也年二十五夫亡遺孤二  
歲氏守而撫成天順八年旌表

孫氏劉儉妻年二十六夫亡養舅姑撫孤克盡慈孝成化二十年旌表

周氏李澤妻年二十五夫亡剪髮自誓姑安氏九十餘患風痺不能步履候起居侍湯藥經年歿葬以禮成化二十年旌表

葉氏王銘妻年二十三夫亡守孤苦節四十餘年以紡績自給教子有成成化二十年旌表

李氏楊江妻燕河營人夫死無子嘉靖九年敵自黃崖入犯被獲擁之上馬不從大罵見殺

戴氏郡庠生陳表妻年二十九夫亡撫遺孤以女工自給四十餘年無異萬曆元年旌表

茹氏庠生朱廷芳妻年二十一夫亡撫孤克儉甘貧守節撫按旌其門

錢氏翟堂妻燕河營人年十九夫亡子守忠尚在襁褓奉姑守節姑八十餘終子亦尋卒門無五尺童家無升斗儲氏與子婦相依爲命人稱雙節

程氏郡庠生李鶚薦妻年二十七夫亡子學孟在抱奉舅姑盡禮撫孤爲諸生守節四十餘年

胡氏郡庠生李瓊妻年二十夫亡撫孤守節

張氏進士郭經妻家貧事姑楊氏盡孝夫卒無嗣守節終身

霍氏青山駐操艾繡妻年二十夫亡長齋守志年至八十餘

張氏東勝左衛知州唐福繼室年二十四夫亡遺腹子調例宜襲世爵族人爭之氏籲天曰得存此息以奉烝嘗足矣讓之教馴成明經任學正子孫綿綿仕宦

羅氏順天大興縣世家女青州守朱鑑之族孫昌期贅若焉昌期亡遺孤明時幼氏依母家守節課子明時占籍大興登萬曆庚戌進士歷任河南兵備道副使

劉氏故家女御史韓應庚五十無子知其貞靜求爲側室父有難色氏曉書史繙晉絡秀傳父解其意乃嫁之年二十八應庚卒生子原濬方十餘歲氏扶嫡郝氏坐堂上呼家僮抱原濬于前慨然諭以撫孤大義內外帖然崇禎庚午郡城垂危氏盡生平耕織所貯括萬金上軍門犒師命原濬避難以存韓祀而身與城爲存亡城陷復以智免楊氏韓御史側室庚午被執大罵而死

宋氏僉憲韓原善繼妻封孺人賦性貞靜年三十而寡力持家政遇前子廣業慈愛佐膏火成名士次弘業已出也甫數歲僉憲卒教之獨嚴仕知縣

王氏華陰令韓應奎仲子原潔妻樂亭王大司徒孫女也庚午夫遇害氏不憚克穢泣尋夫屍於積骸中卽欲枕屍而死姑徐氏攜孤坤業百端勸慰乃忍慟勉從逾兩月生遺腹子泰業苦節守志教子遊泮鄉稱大慈

李氏布政克濁之女適盧龍衛指揮焦承勳勳居官廉有父潤風早卒氏年二十餘哀毀絕粒誓欲殉夫姑諭以遺孕在腹當念焦氏後氏乃勉從姑命生子效良撫孤奉姑靡不周至終身非至親不面詔旌

韓氏光祿監事李浣妻封御史廷義女也夫卒無嗣哀毀廬墓復肖夫像并夫之父方伯公祖郡守公之像築萬柳莊別業祀之自製詩文書於壁給事白瑜勒石記之

陳氏太僕卿王庭長女適庠生韓景昌庚午景昌死于兵氏扶八旬祖姑攜三歲孤遇春皆得保全教子爲諸生

陳氏名靜英太僕卿王庭次女字灤州高尚書孫士鳳年十四庚午亂中鄉紳白某妻羅氏知其美而慧欲爲侄娶

之給太僕夫人云令將選民女迎英避其家英往羅僞言  
高闔門被殺強之議婚女不可夜簪高聘釵自縊詔旌  
秦氏兩當知縣李可培妻庚午不屈投井死子生員正藻  
被殺婦田氏年十九子端生六日投井救免養祖姑至九  
十撫端爲庠生守節三十年

彭氏陸純妻夫故守節撫子松成立年至八十五松死庚  
午之難妻梁氏撫孤完節年至七十五人稱雙節

韓氏盧龍衛指揮同知焦慶延妻庚午夫戰死陴間氏卽  
求死家人力止之出城遠匿山莊守節二十餘年及卒與  
夫木主合葬之

王氏庠生韓原相妻庚午率子婦呂氏俱縊死

李氏南戶部主事朱文運繼妻年二十六夫亡子濟美方  
九歲遺橐蕭然氏事姑盡孝內治中外課子務農家業不  
墜建坊旌表

王氏東勝衛程玉妻夫亡里媼欲奪其志啗姑以厚利氏  
竊知之泣曰妾卽窶家兒顧可以利失身乎投繯而死總  
兵羅希韓葬之城西蘆崗總理戚繼光爲之立碑

謝氏永平衛楊太芳妻夫亡絕粒九日而死與夫同棺以

殞

王氏湯世功妻夫亡守節撫子思道成立任叅將

王氏盧龍衛指揮僉事孫鉉妻年二十二夫亡甘貧守節  
撫孤光普承襲世職

牛氏盧龍衛百戶馬逢時妻夫故守節訓子玉聰列郡廩  
生庚午城陷自縊完節

陳氏舉人廖從周子承訓妻庚午承訓與叔師周俱被害  
師周妻劉氏病遺孤雅尙未週齡氏恐廖門無後舍已女  
以乳叔教入泮雅亦以母事之人稱節孝

王氏庠生侯王臣妻夫死不食七日而死

陳氏王自省妻年二十餘夫亡矢志守節教子耀祖顯祖  
爲諸生

楊氏永平衛監生張世昌妻夫亡無子守節詔旌

張氏東勝左衛白鏞妻夫亡養姑守節人無間言詔旌

劉氏東勝左衛總旗盧尙欽妻年二十一夫亡遺孤彥忠  
甫三月欲死以殉姑與父母謂之曰死矣柰孤何乃強從  
撫孤有成

石氏千總朱鎮胡妻鎮胡從軍歿氏年二十餘或憐其少



艾無子勸之嫁氏悲號欲絕茹辛忍苦紡績資贍幾四十年始終一節

蔡氏郡庠生韓修業妻夫亡氏年少無子矢志苦守四十餘年始終一節

尙氏庠生李思敬妻姑年衰暮夫患痼疾氏奉養服勞克盡其道姑與夫相繼而歿子枏甫八歲含冰茹荼教之遊泮守志五十餘年

東勝衛指揮張國韓妻韓氏及邑民高應礮妻侯氏劉聲遠妻楊氏劉承教妻賈氏王惠民妻沙氏俱以庚午城陷死節

豈氏燕河營宋成祿妻年十九夫亡遺子鴻儒方三月教成食餼縣庠壽至七十餘崇禎十四年旌表

國朝邢氏田國祥妻崇禎庚午祥歿於難氏攜三月孤縋城避兵甘貧苦守教子三傑爲郡庠生

李氏庠生薛文龍妻崇禎庚午龍歿於兵氏撫育兩孤茹荼訓誨長子國佐中順治辛卯將材武舉

李氏陳靖策妻夫亡上事耄姑下撫幼子食貧守志三十餘年三子俱成立

王氏周士昌妻婚百日夫亡孝事舅姑生遺腹子恩勤苦  
守未幾子又亡氏矢節終身不渝

劉氏楊體亨妻夫亡事姑盡孝撫孤成立

王氏馬大德妻夫亡遺孤甫八歲食貧守節訓誨有成

沈氏王輔妻事舅與繼姑維謹夫亡撫孤成立孝慈可風

管氏庠生劉亮輔妻年二十九夫亡辛勤撫孤成立子又

亡氏慰媳撫孫守節三十餘年今六十餘歲

張氏庠生毛俊岐妻年二十五夫亡撫孤成立守節三十

六年今六十一歲

郭氏庠生張宏妻年二十九夫亡兩孤幼氏矢節苦守撫  
教成立

楊氏庠生丁維楫妻年二十夫亡遺孤蕙方二歲氏矢志

苦守孝事孀姑教子遊泮歷今三十五年

張氏武進士赤城守備趙躋妻夫亡守節奉親撫孤內外

無間教子統國中康熙庚午武舉

張氏庠生沈蘊秀妻年二十七夫亡奉姑苦守教子應昌

及孫遊泮今八十三歲

蔡氏綏遠將軍毓榮公女也賦性端貞適候補主事金墩

生年十八夫亡遺一子一女子旋亡氏矢節彌貞繼侄啓復爲嗣恩勤撫教今任內閣撰文中書康熙四十二年覃恩誥封太孺人

韓氏蔡將軍仲子海鹽令珣妻原任貴州按察使阿琳妹也性貞淑嫺禮訓夫亡守節家政肅然遵夫命撫幼叔瓚教誨成立

張氏八家寨民李自璵妻年十九夫亡孝事翁姑撫遺腹子成立守節三十餘年

李氏燕河營民武宏昭妻夫死他鄉氏矢節事姑教子苦守四十年今七十歲

王氏年二十三歲適周家莊民周阿京甫婚三月夫亡卽欲殉節因有遺孕勉事舅姑生子起麟撫成忽溺死氏矢志益貞翁耄年納妾生子氏備極恩勤撫叔成立旋爲婚娶生二子繼其一爲嗣苦節五十四年今七十七歲郡守張公朝琮旌曰純節功高

沈氏侯各莊民胡兆麟妻年二十七夫亡撫孤成立守節三十五年今六十二歲

周氏觀音堂莊民張弘義妻年二十五夫亡撫三歲孤成

立矢節三十餘年

張氏戶北寨民玉從聘妻從聘病篤與訣氏誓以相殉及卒氏不哭夫而哭父母謂翁曰翁雖愛子奈家貧買棺寧薄勿厚毋謂婦身可償棺資翁哭而應之及買棺回已閉戶引剪自盡矣卒年二十歲郡守張公朝琮旌曰慷慨從終

高氏石家溝民馮瑄妻年二十七夫亡矢志苦守撫子瑞雲入泮

傅氏爛石山莊民張弘士妻性至孝年二十六夫亡家貧親老女志代供子職舅歿拮据殯葬如禮耄姑在堂朝夕侍奉彌謹守節三十六年今六十二歲

張氏燕河營民穆廷召妻年三十夫亡家徒壁立力勤女紅以事姑撫侄承嗣守節四十年今六十九歲

段氏燕河營民鮑聯捷妻年二十九夫亡孝事舅姑撫孤成立守節四十二年今七十歲

管氏陳官屯民陳美傑妻年二十五夫亡孝事孀姑撫孤成立守節四十七年備嘗艱苦今七十一歲

徐氏蔣瑞秀妻年十九夫亡子女俱無苦守四十三年今

六十一歲

易氏候選經歷趙正貴妻年二十三夫亡矢志甘貧撫孤成立守節五十三年今七十五歲

劉氏趙世英妻夫亡矢節撫孤子又亡撫嗣孫成立守節三十餘年今六十四歲

王氏宋天祿妻年三十夫亡矢志甘貧撫三歲孤成立守節三十四年今六十三歲

郭氏白石營遊擊李重美子若賓妻年二十九夫亡側室潘氏年二十六氏與矢節同守撫遺孤浩遊庠考入內閣

明史館在廷鉅公多題贈揚其雙節郡守張公朝琮旌曰松筠雙勁

李氏王臣妻夫亡矢志靡他孝事舅姑撫成弱子守節三十餘年今六十四歲郡守張公朝琮旌曰貞淑慈徽

謝氏陝西西安府司獄王國垣妻年二十二夫卒於官氏拮据經營扶柩歸里撫三歲孤成立守節三十餘年今五十四歲郡守張公朝琮旌曰無慚斷臂

李氏朱之琦妻夫亡矢志撫孤持家勤儉五子俱成立仲爲諸生守節垂五十年今八十一歲

劉建基山西汾陽人買遷於永娶何氏基旋亡並無宗黨  
氏年十九撫三歲孤矢志節靡他苦守成立歷今三十餘年  
石氏劉承恩妻年二十九夫亡辛勤紡績事姑撫子守節  
四十餘年今七十二歲

高氏榛子鎮民李茂陽妻年二十夫亡遺孤維化甫三歲  
家貧氏矢志苦守孝事孀姑撫子遊泮歷今三十餘年

閻氏庠生韓遇春妻年二十八夫亡撫子生陽入泮娶媳  
孫氏生陽又亡媳年二十七奉姑同矢志苦節兩世孀居脩  
嘗艱苦閻今七十八歲孫今六十一歲

遷安

明許氏進士魏琮孫樟妻年二十夫亡時太姑劉氏在堂  
年八旬兩孤幼氏安貧矢志節績紡以事太姑教子有成孀  
居五十餘年閨門不出有司獎之

吳氏楊彪妻年二十五夫亡欲以死殉念姑老家貧無倚  
矢志守節紡織以奉教子孫並爲弟子員年八十餘卒

丁氏王龠妻年二十夫亡堅貞苦節子之義之孚之砥鄉  
稱孝友孫士選任薊州訓導撫按旌曰母節子賢

郭氏任佑妻年十七夫亡艱辛守節六十餘年撫孤成立

撫按旌其門曰貞節

譚氏建昌營舍人李堂妻年二十夫亡撫遺腹子堅志守節年八十餘卒有司旌之

沈氏建昌營李俊妻年二十二夫亡撫遺腹子幾爲諸生年七十餘卒

李氏建昌營軍餘周維屏妻年二十夫亡遺孤週歲或憐其少勸之他適氏以死拒守節終身不易

徐氏三屯營馬傑妻年二十八夫亡守節撫兩孤仲子玉授錦衣百戶

陳氏興州衛百戶李承恩妻婚三年生子國棟夫亡守節事舅姑生養死葬如禮爲兩叔擇配成家教子以義比長服官有過必撻雖至親終身不出見

紀氏興州衛指揮魏一清妻屢孕不育勸夫納妾清不許氏強納三各生子清亡子俱襁褓氏與三妾誓同撫孤保愛如已出長子如樞襲世職次如楹庠生季如桐舉人自二十七孀居守節三十餘年勤儉慈睦人無間言撫按旌曰節義雙全

石氏興州衛張騰妻少寡無子孀居七十年始終一節壽

永平府志 卷之二十一  
九十卒邑宰馬仁旌曰天壽貞節

李氏三屯營忠義衛軍餘王天祿繼室祿先娶馬氏不育  
乃納徐氏生子增馬亡祿不欲更娶徐勸曰中饋妾可任  
之蘋藻非嫡奚主乎因娶李氏年二十夫亡生遺腹子墀  
舅姑憐之命再適氏曰予妻也有死靡他徐曰吾雖妾豈  
適二夫哉攜手悲慟同勵守節訓育二子勤職紆以供朝  
夕氏年六十三卒徐年八十卒子孫昌熾儒服者三人咸  
謂節義之報

彭氏興州衛百戶滕汝捷妻年十九夫亡家貧無子繼姪  
承嗣績紡度日不出戶庭殯葬舅姑哀痛踰禮嘗曰丈夫  
託我何敢忘之事聞按院題請詔旌年八十餘卒

吳氏興州衛武狀元陸萬鍾妻年二十夫亡無子孝事舅  
姑守節五十餘年

周氏三屯營軍韓金妻金隨征古北口陣亡無子氏年三  
十守節以女紅自養終身有司旌之

杜氏建昌營軍餘張源妻夫亡無子堅貞矢節至六十歲  
卒

周氏庠生馬璽妻璽疾革與訣氏許以身殉及卒屢欲自



盡家人解救百方勸諭氏佯諾理喪事如常乘間投繯死  
年二十二詔旌。

張氏榆木嶺軍孫忠妻年二十一歸忠甫三月夫貧甚病  
竭力湯藥晝夜不怠及亡潛縊以殉

仇氏興州衛百戶沈鳳妻鳳守剗車嶺寨兵亂氏被擄將  
汚之不從遂支解

馬氏庠生何秉善妻冷口兵亂被執上馬至清龍河躍入  
水中死縣建貞烈坊

陳氏三屯營高貴妻賦性堅貞鄰有逼而汚之者勢迫赴  
井死總理戚繼光立石井旁題曰全節井

楊氏貢生韓范繼室年二十餘適范居數載夫亡氏號泣  
幾絕欲自盡家人守之乘間縊柩前家人覺而救之既葬  
歸飲鴆而死

徐氏楊茂華妻崇禎庚午夫歿於兵氏聞夫死卽自縊鄰  
婦救之至次晚以柴草塞門牖放火自焚詔旌縣建節烈  
坊

石氏兵部左侍郎郭鞏側室崇禎庚午城陷自縊死建坊  
旌表

國朝毛氏明光祿寺卿徐雲逵側室生子元修甫八歲光祿逝世矢志撫孤勤儉持家苦節四十餘年壽至八旬順治中邑宰王永命旌曰大節維風

耿氏庠生徐元修妻年二十夫亡遺孤權甫二歲氏矢志事姑四十年如一日撫權爲諸生

李氏庠生劉文舉妻年二十八夫亡室如懸磬績紡汲炊孝事孀姑撫遺腹子昇爲諸生苦節五十餘年

燕氏楊煙濱妻年二十九夫亡守節安貧躬事紡績撫子其盛爲諸生壽至九旬卒

程氏郡庠生羅之鶴妻明山東兵備叅議大猷女也夫亡無子繼姪爲嗣撫愛如已出甘貧堅守節操凜然

劉氏庠生魏燭妻年二十夫亡家貧無子堅志守節事孀姑撫三女苦節五十餘年壽七十餘卒

余氏魏高登妻年十九夫亡事繼姑撫幼子甘貧苦節垂四十年

侯氏庠生王弼妻年二十夫亡遺孤昌緒生甫數月氏堅志守節孝事舅姑撫昌緒遊泮苦節三十餘年

朱氏庠生劉光珂繼妻婚數月夫亡事衰老舅姑撫前室

幼子備極孝慈堅志守節不歸寧者二十年子聚星爲諸生

陽氏楊國奇妻年三十夫亡績紡度日孝事舅姑訓子育和爲諸生堅節苦守四十餘年

米氏庠生王鼎新妻劉氏庠生王恒新妻徐氏王履新妻兄弟相繼早亡一門三孀各撫幼孤共勵守節有司旌之  
張氏沙河驛民馬空羣妻年二十餘夫亡遺兩孤俱幼矢節甘貧女紅自給撫二子成立苦節四十餘年

孫氏王繼衛妻年二十八夫亡撫二幼孤矢志靡他有司旌之

李氏庠生韓儒妻年二十夫亡撫一幼孤矢節甘貧有司旌之

徐氏翁照民妻夫亡孝事舅姑苦節三十餘年

丁氏張一本妻年二十四夫亡遺孤所養未週歲氏孝事衰老舅姑撫子及孫遊泮守節五十餘年今壽七十五歲  
魏氏庠生楊敏學妻年二十夫亡孝舅姑和妯娌撫數月遺孤教誨成立恪恭矢節始終不渝今五十一歲

蔡氏庠生王瑞妻年十九夫亡孝事孀姑撫繼子成立守

節三十六年備嘗艱苦今五十四歲

李氏方沛妻年二十七夫亡遺三幼孤家貧無倚氏矢節茹荼撫育成立苦守三十五年今六十一歲

楊氏武天錫妻孝事舅姑夫亡矢節勤儉持家訓子兩爲諸生守節三十餘年今六十五歲

湯氏庠生張璠妻年二十夫亡矢節孝事舅姑撫遺腹子崇一游庠苦節四十餘年至六十七歲卒

蔡氏庠生徐潛妻年二十九夫亡矢節孝事孀姑撫週歲孤佩荃遊庠苦節三十年今五十九歲

撫寧

明高氏金禧妻年二十五夫亡子鏞方二歲矢志撫孤舅姑憐其少欲奪其志不從人有慕其姿者爭求之氏知夜閉戶窓以艾灼面及覺毀窓入救面灼成瘡矣勤女紅課鏞讀書官光祿寺署正封氏太孺人年九十終詔旌

王氏喬潤妻年二十六夫亡子嵩在抱氏以節自持撫子爲明經官山東長山知縣完節詔旌

李氏姚斌妻年二十七夫亡子政襁褓誓不他適紡績供政讀書領永樂丁酉鄉薦累官兩浙鹽運使詔旌以子貴

贈太宜人

王氏翟昊妻年二十五夫亡子鵬方三歲矢節自守閉門  
績紡課鵬讀書雖至親不面鵬登正德戊辰進士授戶部  
主事詔旌以子貴贈太宜人翰林院修撰李廷相叙之  
劉氏庠生許俊妻年二十四夫亡遺孤幼弱勤女紅撫子  
成立年八十卒人無間言詔旌

李氏金鶴妻年二十八夫亡無子貞節自勵誓不他適感  
舅妾張氏劉氏同守衣食屢乏節操愈堅詔旌一門三節  
袁氏庠生賈真儒妻年二十八夫亡絕粒勺水不入口欲  
從夫地下親屬勸之曰姑老子幼汝死何賴強起食親女  
紅敦儉樸孝事孀姑撫二子遊泮年逾七十節堅髮白婦  
道母儀克盡

華氏撫寧衛軍餘華壽女母潘氏年二十五壽告回原籍  
取軍裝去無消息時女方五歲母曰夫去不回女幼無靠  
我將何之誓守此女貧苦不恤及女稍長母欲議婚女曰  
母爲我守我安忍離母哉亦誓與母共甘苦如是者幾四  
十年母故遂柩母於床側其節益勵破屋半間風雨不蔽  
衣食常缺惟閉戶念佛而已至萬曆七年病卒年六十餘

矣鄰里憐之爲助棺舉葬焉知縣徐汝孝上其事詔旌其門爲貞孝之門。

王氏庠生王堯相妻年二十一夫亡晝夜號泣勺水不入口姑以姑老子幼諭之乃毀容截髮勉事鞠育姑病痿飲食扶掖曲盡孝道及卒祭葬如禮紡績訓子三十九年如一日萬曆戊午子調元領鄉薦直指劉公思誨以錚錚一具鐵心凜凜滿腔血性姑無缺養九泉子職猶供子賴成名半世書香不泯具題建坊旌表

朱氏李鶴年妻年二十六夫亡守節撫孤天培成名壽八十六卒

范氏任子孝妻年二十七夫亡茹荼飲蘖矢節七十年壽九十七卒

惠氏州同郭朝元妻年二十九夫亡守節撫孤遊庠

賈氏楊枝盛妻年二十四夫亡守節撫孤遊庠

周氏溫應學妻年二十四夫亡守節撫孤成立

祝氏都司陳復先妻夫亡守節撫孤成立

惠氏茹英妻年十九夫亡無子撫繼姪苦守四十九年

傅氏庠生王有慶妻年二十七夫亡守節撫孤遊庠壽九

十卒

徐氏庠生傅大成妻年二十七夫亡守節撫三子俱遊庠

張氏庠生蕭春育妻夫亡守節撫孤成立

單氏庠生蕭奇幹妻夫亡守節撫孤遊庠

楊氏庠生鍾朝傑妻年二十七夫亡守節撫孤遊庠

董氏王隆明妻年二十七夫亡守節撫孤遊庠

楊氏李守敬妻年二十四夫亡守節撫孤成立

魯氏劉天學妻夫亡孝事舅姑守節終身

史氏趙中正妻夫亡守節撫孤成立壽八十卒

國朝高氏進士田國足妻年二十七夫亡守節孝事舅姑

撫孤遊庠

樂氏馬承爵妻年二十一夫亡遺孤在抱孝事孀姑撫子

成立

張氏庠生田如梁妻年十九夫亡守節撫孤遊庠

張氏羅士儉妻夫亡守節撫孤成立

王氏楊會妻年二十二夫亡遺孤在哺苦守成立

楊氏張國仕妻年二十二夫亡遺孤三歲矢節撫教成立

劉氏楊鳳翼妻年二十四夫亡守節撫孤備嘗艱苦

田氏庠生陳斯文妻年二十五夫亡矢節撫子成立苦守六十餘年

黨氏惠應徵妻夫亡撫孤守節終身

夏氏庠生丘行三妻夫亡子女俱無守柩四十餘年卒親族爲之合葬

惠氏庠生茹良翰妻年二十七夫亡守節至八十歲卒

黃氏焦朝卿妻年十七夫亡撫孤守節終身

楊氏朱廷佐妻年二十四夫亡守節撫孤五十餘年

賀氏孫承宗妻年二十夫亡守節撫孤成立

郭氏鄭起鵬妻年二十七夫亡守節撫孤成立

惠氏鍾之彥妻年二十四夫亡守節撫孤成立

董氏齊步瀛妻年二十二夫亡守節撫孤成立

趙氏齊應聘妻年二十四夫亡守節撫孤成立

惠氏傅稟成妻年二十八夫亡無子苦節至八十餘歲卒

張氏總旗田芳顯妻年二十夫亡無子守節六十餘年

傅氏賈一麟妻年二十夫亡子女俱無守節四十餘年

任氏庠生唐之魁妻年二十夫亡守節四十餘年

翟氏庠生王輔妻年三十夫亡守節三十餘年



孫氏陳天祿妻夫亡舅姑憐其少而無子命改適不從自縊死

陳氏單勉行妻年二十三夫亡撫孤守節至八十餘歲

楊氏庠生陳鴻策側室夫與嫡俱亡已無子女守柩十餘年窮餓不悔苦節終身

陳氏庠生馮永清妻年二十八夫亡守節撫孤成立

鄒氏楊克禮妻年二十夫亡無子堅志守節至八十餘歲馬氏庠生金啓成妻年二十七夫亡無子守節孝事舅姑族人憐之繼姪爲嗣

王氏署渭南令蕭葦妻年二十四夫亡守節撫孤成立

張氏王一元妻年十九夫亡家貧姑老子未週歲苦守五十餘年

張氏王晏妻夫亡遺孤振祖甫週歲矢節撫成娶祖氏生子週歲振祖又亡氏與子婦勵節苦守撫孫成立

陳氏庠生高科妻年二十四夫亡子方在抱撫教遊庠苦節五十餘年

趙氏王址妻年二十五夫亡矢節苦守三十六年

趙氏庠生楊毓英妻年二十七夫亡守節撫孤成立

劉氏高庭桂妻夫亡守節撫孤成立

陳氏庠生茹春芳妻年二十七夫亡三孤幼撫訓成立仲

良翰遊庠食餼守節垂六十年至八十六歲卒 詔旌

陳氏校尉楊鳳鳴妻年二十五夫亡勵節苦守撫孤成立

至七十歲卒 詔旌

陸氏庠生王紹先妻年二十一夫亡無子決志殉夫家人

防之甚密後稍疎自縊杏樹下康熙二十年督學吳公珂

鳴具題 詔旌

楊氏回安社民劉忠妻年二十五夫亡守節撫孤成立

孫遊庠苦節五十年

王氏庠生劉振興妻年十九夫亡遺孤甫三十六日姑與

祖姑皆寡三世僅恃一綫氏仰事俯育備嘗艱苦姑與祖

姑繼歿竭蹶殯葬如禮苦節三十餘年教子廷瑚遊庠生

四孫今五十三歲郡守張公朝琮旌曰節孝無雙

王氏庠生翟琪妻年二十四夫亡遺孤三歲幾欲身殉舅

姑勉以撫孤大義乃止家貧紡績以供菽水身受饑寒苦

節五十餘年教子遊庠食餼孫曾繞膝今七十六歲

高氏武舉蕭箕妻年十八夫亡遺孤週歲甘貧勵節孝事

繼姑撫子成家孫遊泮今八十一歲

魯氏萬家莊社民李九齡妻年二十三夫亡遺孤週歲舅姑早世祖姑憐其少命改適誓死不從甘貧勵節炊嘗斷會絕食六日戚黨憐而周之得活苦節四十餘年撫孤成立今六十六歲

齊氏萬家莊社民趙文炳妻年二十一夫亡無子孝事孀姑以禮自飭守節三十餘年今五十三歲

王氏侯印祥妻年十九夫亡遺孤甫數月舅姑衰老慨然以事親撫孤爲已任日操井日夜勤績紡五十年如一親歿喪葬如禮撫子成家孫曾繞膝今六十八歲

金氏庠生張慶彩妻年二十夫被盜傷兩孤幼氏艱辛撫育比長兩子又亡守遺孫紡績以給勁節自持今五十七歲

齊氏海上社民王筠妻年二十夫亡兩孤在抱氏矢節事姑衣食弗克辛勤織紡撫子力穡成家苦守完節至五十五歲卒

韓氏山西社民傅迪妻年二十五夫亡家貧子幼矢節不渝苦守四十餘年今七十一歲

李氏張自春妻年二十九夫亡守節三十餘年今六十二歲

張氏國學生王煌妻煌隨父之任莊浪病故氏聞訃號哭幾不欲生姑勸之曰死節何若守節繼姪基豐爲嗣力勤盡孝教子遊庠食餼自二十二歲守節至今六十一歲皓首蒼顏凜然勁節

王氏庠生張希閔妻年二十四夫亡遺孤週歲氏矢節孝事舅姑養生送死婦道克盡撫孤至五歲殤繼族孫爲嗣又亡貧苦煢煢皎然勁節歷今五十餘年

王氏庠生董悉悅妻年二十一夫亡遺兩孤幼氏矢節

姑克嫻禮讓教子遊庠苦守三十餘年

遲氏海洋社民張廷棋妻年二十一夫亡矢節不移力勤織紡今六十一歲

平氏海洋社民平自得女年十八待字隣人趙某窺其姿強暴橫加繼母與女志趨不合每爲趙地女度不免潛以線縫衣上下如織投繯趙門首時康熙三十六年五月二十二日事也趙懼罪移屍莊前井中人言藉藉自得迫衆論鳴官趙供和姦已久並非強逼當事受重賄剖腹驗孕

件作以肚爲胎衣誣女早已失節竟寬趙罪士論寬之墓  
秦皇島墓前立石勒詩郡守張公朝琮旌日光耀日星  
郭三姐龍腰莊民郭大福季女年十八未字一日父母與  
兄他出惟嫂與女居日晡女往田間取菜隣惡王德成窺  
無人尾至田復勒女於北山萬松中強逼不從顛仆所致  
草偃數畝石毆脚踢鱗傷背裂猶慮復甦縊樹上克遁跡  
是夕風雷大作學博宋公琰署邑篆廉兇寘重典大快人  
心郡守張公朝琮旌曰坤元正氣

戴氏庠生諸大益妻年二十六夫亡守節三十餘年今  
十二歲

李氏薛璠妻年二十九夫亡矢志撫孤勤儉持家守節三  
十八年今六十六歲

傅氏江南壽春營副總兵尚謙女也適國學生羅國珍姑  
宋氏自二十九歲守節在堂氏孝事維謹年二十五國珍  
亡二子幼氏與姑相依爲命矢志撫孤力勤機杼教子爲  
諸生郡守張公朝琮旌曰一門雙節

劉氏張家莊社民石朝佐妻年二十夫亡守節四十餘年  
孫氏良仁社民李璇妻年二十三夫亡守節四十餘年

永平府志 卷之二十一  
趙氏回安社民李元成妻賦性端嚴不苟言笑夫亡遺子女各三俱幼穉土屋半間瘠地數畝不足供饘粥氏矢節勤苦晝親農事夜紡績並日而食毫無戚容從不屑乞假隣有恤之者辭弗受教子習農樵完婚嫁課孫讀書苦節四十餘年不樂表揚今七十歲

高氏萬家莊社民溫吉翰妻年十九夫亡遺孤襁褓撫教成立守節垂五十年

楊氏庠生張之忠妻年二十二夫亡守節撫孤成立今七十四歲

郭氏庠生馬襄妻年二十二夫亡遺兩孤幼矢節苦守孝子成立仲遊庠今七十歲

朱氏王果妻年二十六夫亡遺兩孤幼矢節不渝孝事舅姑力勤機杼教子義方今五十五歲

張氏劉從新妻年二十四夫亡遺孤三歲甘貧守節孝事孀姑撫子成立今六十四歲

王氏羅名世妻羅兩世同居舅姑叔嬸在堂家素寒名世謀食他鄉數載一歸氏罄粧資以供甘旨姑病竭奉湯藥及歿舅娶繼姑嬸又歿叔娶繼嬸氏歷事四姑恪執婦道

年二十八夫故他鄉遺三孤幼舅年已老而家愈貧氏慨然以仰事俯育爲己任身受饑寒力勤紡績撫三子成立仲瑄爲庠生守節三十年今五十七歲猶事兩姑惟謹

### 昌黎

元陳氏父隆累官司徒氏通詩經年二十歸應州邢簡孝舅姑閨門和睦生六子親教以經學後二子抱樸抱質皆任遼位宰相卒贈魯國夫人

王氏李賢卿妻年十八夫故誓不他適紡績以養舅姑始終人無間言至正十五年旌表

明劉氏白瑛繼室年二十夫亡撫前室二歲子聰視如己出奉姑紡績始終無二詔旌

汪氏教諭大紳女也適張湖湖歿氏方二十一自知子養

難以存立將已產盡遺張族就養於母家五十餘年清節著聞

李氏郭宗愚妻年二十五夫亡守節撫孤子鎮紡績以資衣食至九十卒

李氏庠生郭然妻年二十五夫亡守節撫一子一女歷盡艱難至九十卒

王氏齊道妻年二十一夫亡誓不再嫁勤紡績孝姑嫜藐孤宗堯甫一歲撫而教之仕宦若子若孫若魯簪纓世濟其美皆節所留

趙氏庠生王尚賓妻年二十五夫亡撫二女清白苦守終如一

王氏上元主簿張昴妾昴卒於任氏甫十九遺有嫡齊氏孤子國祥氏痛夫亡攜孤扶櫬還里守節族人欲奪其志自縊至再七日不飲食知不可奪乃止撫祥成立且仕氏年七十卒侍妾以節聞者難之矧子非其出也縣官爲之請表

李氏王訢妻年二十六夫亡守節至八十七卒

李氏省祭官蘇學顏妻年二十九夫亡守節至五十七卒



元平府志 卷之二十一 三  
王氏谷鍾妻年二十夫亡誓以死從親屬勸不能解防少  
疎遂縊死詔旌

齊氏庠生張至臨妻少寡守節敬事舅姑以壽終

朱氏張瑩然繼妻夫亡氏幼無所出撫前妻子備嘗艱辛  
終無二志長子入仕籍季遊庠有司旌之

劉氏庠生趙斐然妻年二十九夫亡守節紡績茹荼孝養  
舅姑教子有成壽九十六終

張氏高世俊妻李氏高世龍妻兄弟偕亡無子二氏共誓  
守節俱至六十餘歲卒

張氏庠生宋文燿妻不育納側室尤氏生二子九年一  
一夫亡兩孤在抱與嫡矢志同守家業賴以不墜撫子景

光景瑗俱遊庠繼嗣兩門縣旌曰雙節冠世

國朝張氏吉安郡丞齊士斌繼妻年二十四夫亡無所出  
撫前妻子親愛彌篤內外無間道府旌之

汪氏齊士良妻幼寡砥節苦守撫孤遊庠有司旌之

李氏庠生高齊斗繼妻年三十夫亡奉耄姑撫幼子不墜  
家聲

朱氏庠生張我見妻夫亡守節撫孤遊庠

齊氏國學生魏業懋妻明林縣令鳴雷女也夫亡無子委其業於族依母家以守值客兵移駐昌邑與民雜處氏懼辱閉戶自縊有司旌之

白氏進士李雲起妻雲起任黎城令死於寇氏年二十無子矢志事舅姑生養死葬紡績自給人無間言

郭氏苟鶴程妻夫避兵遇盜死氏年少無子矢志靡他有司旌之

曹氏庠生張是達妻夫亡無子砥志守節勤儉自給有司旌之

楊氏庠生張敬宸妻年二十二夫亡遺孤甫三月矢志節  
他歷三十年始終如一

田氏齊士敏妻年少夫亡家貧子幼矢志守節紡績以給撫長子遊庠餘俱成立

黨氏國學生齊士望繼妻婚四載夫亡矢志撫孤成立縣旌云勁節自矢令德有終

劉氏夫名弗傳舅趙萬忠氏年十九夫亡無子父母勸改適氏不從備楮帛奠夫墓晝夜哭潛縊死其家訟舅於官司理某公得其情杖其父而旌之

黃氏張鳴鳳妻夫亡遺孤甫三歲矢節貧苦自甘至八十歲卒

田氏年十七夫幼姑早孀強暴乘姑外出誘之氏拒罵觸怒擊碎其首而死闔邑爲立烈女墳

馮氏庠生田生瑞妻年二十餘夫亡遺孤甫三歲矢志靡他舅姑耄老孝敬弗衰苦節三十餘年人無間言

曹氏舉人趙天錫妻年三十夫亡矢節孝舅姑勤紡績教子琅爲明經郡守張公朝琮旌曰坤貞懿範壽九十一終

張氏田鵬妻年二十七夫亡遺兩孤長甫三歲次生二  
甘貧矢節織紵奉姑教長子克昌遊泮苦節三十六年

六十三歲

常氏庠生李位妻年二十二夫亡矢節撫孤辛勤紡績教子紹祖遊泮苦節三十餘年今五十三歲

曹氏庠生齊如琦妻年二十六夫亡清貞自矢勤儉撫孤教次子澤霈食餼郡庠守節四十餘年至六十九歲卒

高氏庠生齊如雲妻年二十餘夫亡矢節不移紡績課子成立

孫氏庠生齊澤徧妻年二十八夫亡撫繼孤勤紡績伯兄

澤永早世氏爲擇繼撫之一如巳子青年矢節皓首全貞  
至六十歲卒

孟氏馬用德妻年十八夫亡遺孤甫二歲矢節事舅姑勤  
紡績苦守三十餘年

侯氏庠生高濬妻年二十九夫亡遺孤甫三歲矢節茹荼  
教子天權遊泮

馬氏團一社民宋梯雲妻年十六歸宋逾年舅往秦絕耗  
姑旋歿又一年夫亡惟祖翁景時在堂曾任青陽令宦橐

蕭然一門之內上止頽祖下僅弱媳影相弔孤苦倍  
今祖翁年九十病不能動履氏力供甘旨曲爲護持無

繼姪天又繼承嗣矢節三十九年今五十六歲孝慈愈篤  
鐵石彌堅郡守張公朝琮詳請旌表

才氏赤崖社民劉朝宗妻年二十九夫亡遺孤未週歲矢  
志靡他孝事孀姑撫子成立守節四十六年今七十四歲  
郡守張公朝琮詳請旌表

劉氏延昌屯民盛治妻年十九夫亡堅貞自矢孝事舅姑  
送死養生盡禮無愆勤儉持家時出紡績餘資以周親族  
繼姪大經爲嗣撫育教誨慈愛倍至守節三十七年今五

十五歲郡守張公朝琮詳請旌表

趙氏貢生張以忠妻年十八夫亡矢志堅貞繼姪爲嗣竭心撫教守節垂三十年

李氏張化龍妻年二十夫亡遺孤旋天舅亦逝世氏矢節孝事孀姑撫數歲幼叔成立四十年苦節自甘毫無爽德今六十歲

李氏橋頭社民周延助妻年二十三夫亡家貧子幼矢節不渝力勤績紡撫孤成立苦守三十四年今五十六歲

丁氏橋頭社民周文廣妻年二十夫亡家貧子幼矢節孤薪米屢空從無異志苦守三十四年今五十三歲

劉氏曹文質妻年十九夫亡並無子女鄉隣憐其貧苦特甚勸之改適氏矢節自誓繼三歲子爲嗣辛勤撫育教以務農娶婦生孫皆氏苦節所致今五十五歲

劉氏靜安社民田種玉妻年三十夫亡矢節甘貧撫遺腹子成立苦守四十餘年今七十四歲

龍氏文公裔韓法祖妻夫亡家貧日甚力勤紡織孝事庶姑教二子有成長珣中康熙戊子舉人次琇襲世廕儒士

灤州

金義豐縣令李寶信妻王氏值平州軍亂陷於賊賊逼室之氏罵不從賊怒支解之大定十二年贈貞烈縣君

李伯通妻周氏年十六父母許聘李鄰豪覬氏姿欲賄奪之氏以死拒卒歸李後伯通爲豐潤令挈妻子之任金末元兵攻豐潤伯通不知所往氏與子易被執氏不屈自投深塹兵以爲死去之氏得不死携易至汴托居孀李織紵自給教易有成。

元任椿妻董氏幼適椿曲盡婦道未三十而椿亡氏勵冰

霜之操慕共姜之風撫育諸孤俱成立元貞三年旌表椿  
爲南麓先生五世孫

明吳氏王弘妻年未二十夫亡矢志靡他奉嫜盡孝訓子  
有成守節數十年敬勤中禮遠近稱之壽七十餘成化四  
年詔旌

謝氏進士高聰妻聰爲臨邑令卒於官氏年僅三十教子  
謙成進士爲鞏昌守孫擢登嘉靖己丑第官至大中丞氏  
年九十餘累封太淑人旌節壽

許氏名毓英王侃妻年未二十夫亡遺子蕃在抱稍長氏  
訓以春秋成進士爲御史受封太孺人弘治十四年詔旌  
余氏戶部員外郎璘女年十七歸陳瑛二載瑛暴卒氏守  
志足不履闕事舅姑盡道及歿殯祭中矩或曰汝年未艾  
且無遺嬰盍求青年富貴耶以終老乎氏怒號哭成疾不  
肯服藥死弘治十四年詔旌

尚氏李恕妻年二十七夫亡存遺孤姑憐其少欲奪志使  
人屢迫之氏持刀斷髮誓必死衆駭愕始止撫子成立里  
號閨貞

李氏王珏妻守節嘉靖二十六年郡守張公玘來省阡陌

區旌其門

趙氏國學生歐陽玳妻守節萬曆十四年詔旌

吳氏庠生郝邠妻守節萬曆十八年詔旌

厲氏王思文妻守節萬曆十九年詔旌

陳氏李發妻守節萬曆二十二年詔旌

謝氏國學生高朝妻守節萬曆三十年奉旌

邸氏左太妻守節萬曆三十一年奉按院旌

王氏庠生李東妻守節萬曆三十六年詔旌

劉氏庠生李柱國妻苦節萬曆三十七年奉旌

張氏庠生王許妻守節萬曆四十年詔旌

郝氏庠生高陞妻守節萬曆四十五年奉學按兩院旌

李氏國學生韓友蘇妻守節天啓五年詔旌

楊氏庠生王之英妻年未二十夫亡遺孤方數歲氏矢志

訓子胤昌遊太學守節四十年道府旌之

宋氏庠生陳蒙吉妻崇禎三年城破殉節詔旌

馮氏庠生高鉉妻苦節崇禎七年奉旌

甯春姐貧家女年十四生有淑姿獨與母居隣惡覷其母

他出帶刃強逼且力持之女大呼四隣至惡始奔女哭誓



永平府志 卷之二十一  
事  
曰吾女子被男子手近衣領而語無狀何以生爲竟縊死  
後園樹下獄具兵憲劉公景耀寘惡重典自爲文祭之值  
暑月啓棺改櫬女尸如生日不暝旣灌乃暝時崇禎十年

國朝李氏省祭官田國祚妻夫亡守節數十年勤慎自持  
時脫珥以周親族婚葬順治八年郡守朱公衣助旌之

馮氏庠生孟臣極妻崇禎庚午夫死於難氏伏屍飲血欲  
與同盡舅姑力勸撫孤氏長齋奉二終養二親殯葬盡禮  
守節四十餘年康熙十年督學胡公簡敬題旌

聶氏庠生夏輔明妻輔明於崇禎九年隨叔建中之扶風  
縣佐任死流寇家人負骸骨歸氏甫二十歲痛哭欲絕五  
日不食誓以身殉時上有六旬孀姑下有五歲孤子親族  
責以孝養大義氏方起任葬夫之事家貧竭力供甘含血  
教子姑卧病九載晝夜奉侍未嘗少懈及歿殯葬如禮苦  
節四十餘年冰霜凜肅子曰瑚爲諸生事母以孝聞郡守  
張公朝琮旌曰節孝輝映

李氏楊德斌妻居海陬幼喪夫冰蘖自勵撫二子暨孫有  
成苦節六十餘年壽九十無疾卒道府旌其門

石氏庠生倫品著妻夫爲翁妾劉氏魘死氏決志殉夫小  
祥後自備哈襪之屬哭別嫡姑入室自縊遠近奔視顏色  
如生州士大夫爭爲詩文以傳其烈

倫氏國學生張掄英妻年二十五夫亡矢節撫孤事舅盡  
孝躬紡績教子成名至七十餘歲卒有司旌之

王氏庠生倫品觀妻夫亡遺孤可宗甫四十二日矢節孝  
事舅姑及歿典鬻衣釧殯葬如禮教子遊庠食餼苦節純  
孝人無間言康熙三十五年 詔旌

倫氏李先期妻夫亡遺孤本立未週歲家貧親老力勤紡  
績以供菽水教子遊庠守節四十七年康熙三十五年

詔旌

孟氏舉人白培極再繼妻夫亡矢節撫前妻子景易視同  
已出教次子章以貢仕海豐令康熙三十六年 覃恩封  
太孺人年七十餘兩子皆亡猶率兩孀媳勤紡織以課諸  
孫晝夜弗怠

焦氏庠生趙琮妻年二十夫亡遺孤謙襁褓家無斗筲儲  
貞操自勵教子遊庠子旋亡遺孫文蒸幼復辛勤撫課遊  
庠守節五十餘年備嘗艱苦

孫氏庠生趙玘妻夫亡子業全無苦節四十餘年今七十  
七歲族人重其貞操爲立嗣

王氏李雅妻年二十七夫亡遺孤甚幼矢志貞操孝舅姑勤  
儉持家義方教子守節四十餘年今六十九歲

劉氏庠生陳瑋妻瑋遭危疾自知不起謂氏曰家貧爾無  
子可守我死卽他適以圖存氏曰君勿慮我不負君也瑋  
死氏吞溲亦死瑋復甦知妻死乃瞑目氏年二十七郡守  
華公黃輓以詩張公朝琮旌曰真情大義

王氏趙應泰妻年十七夫亡有勸之嫁者不從以無子恐  
之氏曰姑吾母也吾善事而依之復何憂後二十年繼一  
子視如已出又有勸與伯兄異產氏笑曰兄弟分家吾素  
鄙之吾雖婦人不爲是也墻外有空舍數間後徙之有狐  
告同里人曰吾常棲趙氏空宅今彼移置吾無家矣聞者  
曰彼尙有餘房盍改棲狐曰向所居外舍也若內宅彼孀  
婦持節甚嚴正氣可畏吾不敢入聞者異之

蔣氏謝崑妻年十八夫亡無子矢志靡他甘貧勵節兄孀  
有疾不能持家氏力任勤勞悉索典質毫無吝色苦節三  
十餘年同居雍睦內外無間

楊氏普利屯民袁侑妻年三十夫亡無子矢志守節繼姪  
學仲爲嗣上事舅姑下撫幼子茹荼集蓼曲盡孝養親歿  
殯葬如禮娶婦錢氏學仲亡生遺腹天兩孀相依袁祀幾  
絕又繼族姪學商爲子以商子爲孫四十年來備嘗艱苦  
今兩世絕而復續皆氏勁節所延而子婦之節實輝映焉  
吳氏郭運升妻年二十八夫亡呼天搶地自殘其軀苦節  
五十餘年足不踰閭伯階升僅一子憐其節而嗣之生五  
孫康熙戊子仲孫倫登鄉薦咸謂一門節義之報云

### 樂亭

金張氏信武將軍齊某妻錦州故工部尙書九思後也適  
齊封汝南縣君能撫其前子將軍觀史氏從旁問將軍重  
之後將軍卒貞祐初蒙古兵入平灤大掠乃携家之燕亂  
平歸業已焚蕩無餘氏甘辛苦拮据治家竟能保有宗祀  
孀守三十年卒及殯執紼送者千人鄉貢守素其子也  
元石氏太守石某女適豐潤縣尹王伯川生子守興伯川  
早卒其子亦天氏撫其妾子無異已出又丐文立碑祖塋  
紀先世功德翁瑣惡之爲磨其文而削妾子名氏撫成立

比翁卒猶爲立石紀瑣不仕高蹈之志可謂婦人中之慈孝兩全者

明孫氏在城社民宋昇妻年二十七夫亡家貧二孤襁褓氏旦織夜紡以給衣食撫之成立後二子相繼亡又撫遺孫成立年八十餘卒天順五年旌表

王氏時登屯民劉敬妻年二十二夫亡家貧遺一女誓不再適紆刺自給年六十五卒嘉靖七年旌表

李氏火燒佛社民宮富妻年十九夫亡一子襁褓守節四十年無毫忽玷嘉靖八年旌表

葛氏富有屯民黨文明妻年十八歸黨五月而夫亡號痛不輟其母止之氏曰夫死再嫁豈良婦耶因自縊人覺而救甦夫殯防少弛氏竟縊死

商氏庠生劉孟絃妻子珠甫三月而孤餽粥不給氏奉姑盡歡撫孤成立人無間言年七十卒

楊氏庠生盧繼伯妻年十六于歸未再歲夫歿慟欲俱亡時有娠五月姑李恭人亦孀居諭曰倘得一子亦可承祀奈何死爲果生子閨範甚肅奉姑極孝姑病月餘晝夜扶掖嘗藥及卒哀毀盡禮又善奉庶姑宗族多强悍欺孤氏

誠子勤學爲諸生

王氏庠生汪必相妻年十九夫亡遺孤襁褓哀毀骨立自縊柩前賴救獲免紡績事姑姑暑月患癰氏晝夜洗濯敷藥籲天身代果愈逾數歲姑歿雖貧殯葬如禮歷艱四十餘年如一日萬曆三十一年詔旌

國朝劉氏楊甲第妻年十八夫亡矢節撫遺腹孤鍾秀成立食餼于庠壽八十九終孫曾繁衍實氏苦節所貽院道旌之

齊氏庠生甯君錫妻年二十五夫亡撫四歲孤守志不奪紡績以事繼姑食貧無怨至八十餘卒

史氏庠生魏化淳妻年二十四夫亡遺孤三歲甘貧守節撫訓遊庠至八十餘卒

趙氏張應贊妻年二十一夫亡遺孤二歲有富豪慕其姿求聘氏誓死不從孝事孀姑撫子成立子又亡撫三歲孫成立艱苦食貧終身無間至八十一卒

劉氏庠生王時衡妻年十九夫亡矢節撫孤暨孫成立相繼而亡又撫曾孫宗祧不絕皆氏力也壽九十卒

劉氏黑崖子社民康朝選妻年十九遭姪賽各求姦不遂

用斧釘死康熙三十九年 詔旌

高氏賈榮妻年十九夫亡無子或勸之嫁氏自誓守節足不踰閫并不歸寧姑患疽氏吮膿穢奉湯藥數年不怠苦守四十年至五十九卒

姚氏王三晉妻年二十四夫亡無子貧寒徹骨誓以死守繼未週歲之子含珠爲嗣嚼汁喂哺撫育成立爲庠生苦守四十餘年至六十九卒

馮氏庠生蕭濟妻年二十三夫亡遺孤柱甫彌月翁亦旋亡欲奪其志者甚衆氏唯抱哺其子矢節甚堅及子長氏始安苦守五十年壽七十三卒郡守張公朝琮旌曰勁節存孤

高氏庠生王積蔚妻年十八夫亡舅姑早歿遺腹子全斌幼多病氏百計護持含血撫訓得爲庠生以繼書香苦守六十餘年今八十一歲

姚氏張永康妻年二十三夫亡遺二子琥楷俱幼舅姑旋歿氏竭蹶殯葬家貧紡績度日訓子讀書教之曰爾父讀書未成吾不令爾改業者爲爾家書香計也雖辛苦難堪不令子代二子俱爲庠生苦守垂四十年今六十二歲郡

守張公朝琮旌曰茹蘖九熊

葉氏甯璫妻年十八夫亡遺孤佳嗣幼氏甘貧苦守訓子遊庠堅節四十餘年至六十三卒

趙氏馮家稍社民賈思福妻年二十三夫亡無子繼姪爾印爲嗣娶媳景氏甫三年爾印又亡遺孫在襁褓二孀一孤形影相弔貞操並堅撫孤成立氏守節五十三年今七十六歲景氏守節三十九年今五十八歲郡守張公朝琮旌曰松栢雙貞

朱氏江有餘妻年二十七夫亡遺孤永幼氏勁節自持辛勤撫育教子遊庠守節五十餘年今七十八歲

牛氏齊自先妻年二十八夫亡力勤紡織孝養舅姑生事死葬無不如禮撫育二子成立孫曾遊泮矢節堅貞五代繞膝今九十一歲

劉氏葛萬里妻年二十四夫亡遺孤四歲藉紡織延生併日而食或勸之嫁氏曰夫亡而吾不死者以有葛氏一點骨血未絕耳豈貪生人世乎何再嫁爲會大雪房壓氏與子埋雪中二日幸氏弟救得復甦子長娶媳生孫璉子媳相繼亡孫無乳食氏一壁紡織一壁哺喂及孫長令就讀



義塾氏自甘飢餒遺食於孫諸艱備嘗教孫遊泮苦節四  
十三年至六十六卒郡守張公朝琮旌曰勁節貽謀

劉氏王君相妻年二十一夫亡矢節甘貧敬事舅姑辛勤  
訓子苦守三十年今五十一歲

李氏庠生闕相宸妻年二十七夫亡耄姑在堂三子幼仰  
事俯育孝慈兼至長子嘉猷次徽猷入國學季綬猷爲庠  
生守節六十餘年壽九十三卒闔邑紳士交稱其賢郡守

張公朝琮旌曰純貞壺範

張氏吳宗聖妻年二十三夫亡舅姑早歿遺孤三歲赤貧  
無依藜藿自甘撫孤成立苦節四十餘年今六十六歲

張氏王調元妻年二十七夫亡家徒四壁矢志彌堅紡績  
度日撫孤成立苦節五十餘年今八十歲

陳氏庠生商雲生妻年二十五夫亡孤幼或勸改節氏心  
如鐵石日勤紡績以事舅姑及歿殯葬如禮撫子成立鄉  
里稱賢苦節垂四十年今六十四歲

白氏高甲妻年二十二夫亡孤幼家貧績紡撫育苦節四  
十年今六十二歲

任氏賈升妻年十九夫亡遺孤未週歲矢志完貞辛勤撫

育守節三十餘年至五十三卒

楊氏石崇玉妻年十八夫亡耄姑在堂遺孤二歲氏堅貞

自矢孝慈兼盡苦守三十六年今六十五歲

王氏楊甫望妻年二十六夫亡冰霜自勵紡績撫子苦節

三十餘年今五十七歲

王氏國學生賈朝聘妻年二十三夫亡矢志靡他孝事舅

姑辛勤教子守節三十年今五十二歲

鄒氏庠生賈士英妻年二十七夫亡姑老子幼家貧歲饑

氏矢節力勤織紡仰事俯育備極孝慈教子遊庠苦節垂

五十年今七十四歲

郭氏醬家河社民賈士祥妻年二十二夫亡遺兩孤幼矢

節孝事舅姑及歿殯葬盡禮撫子成立長為諸生守節三

十年今五十二歲

山海衛

明黃氏女名妙宣年十七許字龍昇屆十九未婚而昇亡女聞訃哀慟不食久之有求聘者女不可父母強之則以死誓知不可奪乃止侍親極孝飲食衣澣皆出其手族叔孀俱亡遺三尺孤特爲撫養且教之成立年踰七旬顏髮如童其天植之節乎

趙烈女一片石軍人趙來住女年十六未字其母過隣家有同戍軍窺母不在假借針挑女女怒手批軍面軍驚去母歸哭訴曰我爲女子尙未適人賊軍輒敢淫語誰我安

用生爲求自盡母防之旣三日給其母曰盍往理煤母出遂闔戶自縊死郡守張公世烈勘明置軍于法爲之營塋樹碑以旌其烈焉

張氏千戶女爲李百戶長男昇之婦昇之病死無子晨夕哀慟見者感動舅姑強之嫁七日自縊死

郭氏庠生何志道妻年二十四夫亡舅姑子女俱無父母憐其子處取歸養之諷以別醮誓不可屢強乃佯許曰卽改嫁須還顧何門及至何痛哭竟日中夜自縊死部使商公誥旌之

田氏千戶劉世隆妻國學生田路女也世隆守界嶺口陳亡時氏年二十九子處矢死靡他至八十七卒孀居五十八年備嘗艱苦部使商公誥旌之

郭氏都督張世忠妻壽官郭茂女也忠死事氏年二十九幾欲捐生戚屬以撫孤勸矢志二十餘年卒御史溫公如璋疏稱夫爲國而死忠妻爲夫而苦節昭哉雙義允矣可嘉特豎旌坊

蕭氏庠生張雲鶚妻父蕭大壯亦庠生鶚卒氏年二十六遺子重立甫五歲室如懸磬苦心撫訓領萬曆癸酉鄉薦

重立又卒遺妻王氏及幼子三人氏與子婦艱苦共守撫諸孫長並攻儒業年七十五卒部使孟公秋旌之

林氏衛卒羅榮妻年二十七夫亡家貧子幼苦志自守孀居六十九年壽九十六卒

郭氏朱澄之妻年二十二夫亡無子甘守孤貧苦節垂六十年壽八十卒

倪氏國學生藥養義妻年二十四夫亡矢節撫二子苦心訓育成立壽八十卒巡撫李公頤題旌

張氏劉復初妻年二十七夫亡僅遺一女語及改適輒慚憤孝養其姑終身無敢違禮

王氏庠生施允宸妻年二十六夫亡舅姑子嗣俱無窮苦勵節三十餘年至五十九卒

韓氏千戶高世勳妻年二十六夫亡遺孤尙忠方懷抱撫育苦守當子襲職時氏正七十歲

劉氏千戶洪大金妻年二十夫亡家徒壁立撫孤成人苦節六十餘年

劉氏國學生蕭被遠妻太僕卿復禮女年二十八夫亡子女俱無孤守四十餘年閨門不出笑言必謹代巡吳公阿

衡旌之

林氏庠生程繼中妻年二十六夫亡引刀欲殉家人力勸不得死乃毀容斷髮矢節終身代巡吳公阿衡旌之至七十二卒

羅氏庠生鄭廷獻妻年二十二夫亡守節不渝撫子克升遊庠食餼而氏已老代巡吳公阿衡旌之

詹氏庠生馮九鼎妻年十九夫亡遺孤甫六月艱苦自守誓不他適至四十七卒鄉人哀之

魏氏指揮李宗堯妻年二十五夫亡無嗣守節六十年院道屢旌

王氏庠生蕭裕遠妻萊陽知縣從政女也年三十夫亡遺一女孤守無他志動循禮法老年而終代巡吳公阿衡旌之

魯氏儒士穆齊崙妻年十六夫亡遺一子氏卽欲殉爲子而留剪髮營葬孤苦四十餘年內外無間

郭氏庠生李養士妻年二十六夫亡遺孤六歲貧苦勵節以針工自給至六十九卒

周氏韓國禎妻少嫠幼孤斷火絕粒日攻鍼指撫子有成

永平府志 卷之二十一  
郭氏徐承恩妻年二十一夫亡遺孤甫週歲及塋臨穴欲  
殉舅姑親屬力勸乃止守節三十餘年至五十二卒

張氏儒士辛棟隆妻年二十一夫亡家甚貧遺孤幼侍養  
舅姑女紅課子遊泮代巡吳公阿衡旌之

楊氏庠生張翹妻翹孝廉重立季子也孝廉早世孀姑王  
氏在堂翹亡氏年二十守孤子四歲不辭貧窶孝姑教子  
祖姑孫婦三世俱以節聞

孫氏庠生蕭行遠繼妻年二十歸行遠克執婦道慮夫無  
嗣脫珥置勝未育夫亡伶仃靡倚孤守四十年臨終幾無

殮者

郭氏庠生譚有臨妻年二十夫亡誓死殉夫慈姑多方勸  
慰鞠養週歲呱兒苦節四十餘年撫子成立

范氏千戶張守誠妻夫亡幾欲捐生篤志孤守針工自給  
允稱苦節

陳氏標兵馬如麒妻麒從鎮將追勦叛兵卸甲中風死氏  
聞變誓以身殉時年二十五有子甫四歲麒柩停北門外  
赴柩側哭三晝夜目不暝食不進姑勸以撫孤乃謂姑曰  
若非爾子耶二十六歲尙不能事姑以終天年此斃斃者

又何恃焉遂棄不復顧乘間自縊死關內道范公志完請  
于巡撫宋公國棟允令配享貞女祠

按關外貞女祠乃祀孟姜女也明末范公志完崇其祀  
典春秋致享合關門已故諸節婦設位配享其間頒祚  
于各節  
婦之家

國朝穆氏李天祚妻住盛水莊順治元年闖賊寇關天祚  
送妹入城賊忽至莊欲強逼氏怒罵不從抱女投井死年  
二十六歲

王氏庠生郭聲遠妻年十九夫亡遺孤未週歲矢志靡他  
事舅姑以孝聞守節四十餘年至六十卒

郭氏蕭之高妻年二十九夫亡冰節自矢撫遺腹子成立  
遊庠苦守四十餘年至七十二卒

徐氏庠生郭重發妻年二十六夫亡止遺一女矢節苦守  
幾五十年至七十五卒

李氏庠生郭重美妻年二十八夫亡遺兩孤幼矢節  
訓  
長子遊庠又亡家貧以針工自給艱苦四十餘年至七十  
一卒

潘氏王爾勤妻年二十一夫亡遺孤未週歲艱苦撫育立  
志不移子長遊庠食餼守節垂六十年



穆氏庠生劉廷鞏妻年二十九夫亡無子矢志節勤織紵孝  
孀姑苦守垂五十年

王氏譚有章妻年二十三夫亡遺孤三歲舅姑旋歿家業  
中落藉女紅課子弘道爲諸生苦節五十餘年

曹氏劉世名妻年二十七夫亡遺孤四歲矢志靡他撫子  
遊泮守節垂五十年

郭氏庠生劉秉乾妻年十九夫亡止遺一女家貧織紵養  
親撫女曲盡孝慈女甫及笄又亡孤苦茹荼歷五十餘年  
初終無間

穆氏趙夢輻妻年二十九夫亡遺孤二歲矢志節孝事孀姑  
親操井臼勤儉持家訓子爲諸生苦守三十餘年

林氏魏士翰妻年二十七夫亡甘貧矢志節撫孤成立貞守  
五十餘年

馮氏庠生任嘉彥妻年二十九夫亡遺兩孤幼撫養維艱  
矢志苦守終身不渝

穆氏庠生王欽明妻年二十七夫亡舅姑子嗣俱無矢志節  
茹荼親睦妯娌苦守三十餘年貞操彌堅

董氏庠生程體觀妻年二十九夫亡遺孤幼勵志苦守教

子遊庠始終一節

何氏蕭升妻年二十七夫亡子幼矢志靡他孝事孀姑終身勁節

蔡氏國學生呂煥如妻年二十一夫亡遺孤甫週歲家徒四壁艱苦備嘗孝奉姑嫜撫子成立

董氏國學生郭進妻年二十七夫亡無子矢志堅守歷三十餘年人無間言

朱氏庠生馮騰蛟妻年二十七夫亡子幼與姑詹氏同守婦節貧苦自甘歷久彌勁

楊氏于應祥妻夫亡子幼矢志靡他孝姑彌謹其母憐其少與姑議令改適堅志不從及服闋歸寧母強之益力遂痛哭反氏揣事迫向夫靈大慟比暮自刎死郡守張公朝琮旌曰巾幗完人

解氏馮九徵妻年十七夫亡遺孤甫五月堅貞自勵撫子遊庠守節四十年至五十七卒

常氏王子武舉郭垣妻年二十一夫亡遺孤麟甫三歲矢志苦守力勤紡績教子中癸酉武舉守節三十七年今五十八歲郡守張公朝琮旌曰封髮九熊

劉氏王慎修妻夫亡撫子成立娶媳張氏子又亡姑媳同撫一孫苦守數十年郡守張公朝琮旌曰松栢輝映

呂氏庠生程啓元妻光祿卿鳴夏孫女年二十二夫亡遺孤先登甫三歲矢節孝事孀姑撫子遊庠歷今五十年貞操皎然

邢氏庠生楊兆生妻年二十九夫亡矢節甚堅勤儉持家始終無間撫三子成立仲進增廣生

唐氏庠生劉天德妻年二十八夫亡已無所出妾聶氏年二十二生子甫三月氏與聶矢志撫孤女紅以資薪水歷

艱苦十八年孤又亡乃告族人乞繼堂姪為嗣及氏卒聶哀痛盡禮與夫合葬其守貞之志迄今彌勁

張氏庠生穆維願妻年二十二夫亡遺孤宗璠甫三歲矢志苦守辛勤織紵教子遊庠守節三十七年今五十八歲

穆氏庠生趙煥妻年十七夫亡遺孤汝楫甫二歲勁節自勵始終無間課子遊庠貞守三十三年今四十九歲

呂氏穆宗孟妻年十九夫亡遺孤開誠甫二歲矢志不渝自甘勤苦教子遊庠守節三十三年今五十一歲

夏氏庠生穆維節妻年二十夫亡遺孤幼矢志靡他撫子

成立守節三十四年今五十三歲

穆氏呂時名妻年二十二夫亡遺孤承祖甫三歲清貞砥節辛勤織紡教子遊庠苦守五十年今七十二歲

喬氏詹寬妻年二十二夫亡遺子三歲女襁褓貧苦無依

衣食常缺氏矢志節彌堅惟憑女紅拮据存活及女適人子習藝尙不能娶氏竟饑寒死畢生苦節卒年四十九歲

房氏庠生王成基妻年二十二夫亡家甚貧兩孤幼冰蘖自勵誓死靡他資針工撫子成立苦守三十六年今五十七歲郡守張公朝琮旌曰節懋功高

劉氏鄭遇時妻年二十七夫亡三孤幼矢志節孝事舅姑力供菽水及歿殯葬如禮辛勤撫子成立苦守四十餘年

郭氏趙正功妻年二十一夫亡遺孤甫八月上無舅姑終鮮伯叔氏矢志堅守鐵石不移貞節垂三十年教子文煥爲郡庠生郡守張公朝琮旌曰冰霜壺範

陳氏國學生任中傑妻年二十九夫亡五子俱幼矢志堅貞劬勞紡績撫課諸子成立四列膠庠守節三十六年今

六十四歲郡守張公朝琮旌曰堅貞式穀

魏氏薛邦興妻年二十四夫亡家貧無依矢志節甚堅誠孝

事姑義方教子苦守三十餘年今五十五歲

李氏儒士計可成妻年二十二夫亡家貧子幼勁節自持  
紡織精勤動循禮法撫孤成立苦守三十餘年今五十三  
歲郡守張公朝琮旌曰金石貞操

劉氏牛文龍妻年二十八夫亡矢志靡他孝事孀姑勤操  
家計撫子良佐遊庠守節五十餘年至八十卒

張氏傅尙卿妻年二十四夫亡子幼矢節撫孤及長又亡  
遺兩孫復撫課遊庠曾孫亦泮甘貧完節三世賴其劬勞  
守節五十餘年至七十六卒郡守張公朝琮旌曰純節貽

謀

房氏儒士趙劬妻年十六歸趙甫三月夫亡誓死靡他生  
遺腹女撫訓備至擇婿字之苦節垂三十年今四十四歲  
郡守張公朝琮旌曰節比松筠

劉氏蔣元輔妻年二十二夫亡家徒壁立矢志守貞生遺  
腹子懷蓋日資紡織撫孤成立苦節三十三年今五十四  
歲郡守張公朝琮旌曰冰霜勁節

董氏程起雲妻年二十二夫亡矢節孝事舅姑力勤紡織  
教子法爲郡庠生守節三十七年今五十八歲

王氏杜朝盛妻年二十五夫亡止遺二女孤苦伶仃織紝自給矢節三十四年今五十八歲

張氏常進文妻夫亡遺兩孤幼氏矢節撫成俱授室次子時興亡媳徐氏年二十三遺孫僅兩月長子時泰候選經歷又亡媳王氏年二十九三孀相依撫兩孫成立秉信爲郡庠生氏今八十四歲王氏徐氏俱六十餘郡守張公朝琮旌曰一門貞節

侯氏庠生趙登雲妻年二十六夫亡遺孤丹未週歲內外無倚氏矢節力勤針工撫子遊庠苦節四十餘年今六十

八歲

趙氏林枝宗妻年二十三夫亡幾欲捐生舅姑曲諭撫孤大義乃矢節盡孝撫三歲子毓琦貢入太學守貞五十餘年今七十四歲

張氏王應新妻年二十七夫亡遺兩孤幼撫育成立仲子加士娶婦郭氏年二十三加士亡遺孫三歲氏與媳相依苦守始終無間今氏八十二歲郭氏五十六歲郡守張公朝琮旌曰一門雙節

劉氏潘天柱妻年二十六夫亡家貧子幼或勸之嫁氏誓

死堅守撫孤成立苦節三十五年今六十歲

張氏庠生馬應運妻年二十七夫亡子幼孤苦伶仃饗殮

不給氏辛勤撫孤績紡度日守節三十餘年今五十九歲

傅氏劉文登妻年二十七夫亡子幼家業日窘氏矢志撫

孤食貧無怨教子有成守節垂四十年今六十五歲

侯氏高琳妻年二十二夫亡遺孤文繡甫四十日矢節事

舅姑養生送死備盡孝道殷勤撫育教子遊庠苦節四十

年今六十一歲郡守張公朝琮旌曰勵節全慈

計氏郡庠生王象賢妻年二十一夫亡無子冰操自勵孝

事孀姑朝夕靡懈苦守二十餘年四十二歲卒家人哀其

賢節繼姪璋嗣之

牛氏國學生謝昌言繼妻年二十九夫亡家貧勤女紅奉

姑生事死葬盡禮撫前子女如已出子丕顯食餼郡庠守

節垂三十年郡守張公朝琮旌曰斷髮授經

王氏周璉妻年二十二夫亡遺孤三歲矢志靡他撫子成

立守節三十年今五十二歲

朱氏趙德芳妻年二十五夫亡遺三孤幼矢志靡他紡織

自給撫子成立教孫遊庠苦節五十年

柴氏李起鳳妻年二十九夫亡兩孤幼矢節持家義方教  
子長聯芳次聯捷俱入太學貞守五十餘年至八十三卒  
李氏何爾通妻年二十九夫亡守節教子昌運遊庠今六  
十六歲

何氏郭萬里妻年二十二夫亡矢節苦守撫子成立始終  
不渝

田氏王雲鳴妻年二十七夫亡遺孤二歲矢志堅貞撫子  
成立守節三十六年今六十二歲

### 流寓

天地逆旅何莫非寓然唯賢人君子足跡所至則其  
地隨在得名逸少之于山陰康樂之于永嘉固矣而  
蘇東坡亦于黃州有雪堂遠歷惠儋卒買宅陽羨營  
楚頌亭留筆扎其眉山故武反不必問人顧貴自立  
耳弧矢四方亦安必騎款段馬第使鄉黨稱善人爲  
但萍踪湮沒塵壤者亦多矣高賢託足其間覽勝悠  
遊因時播越亦自有幸不幸而深爲斯地之幸山川  
增色可不借以並傳



晉趙至字景真代郡人寓居洛陽幼時詣師受業聞父耕叱牛聲投書而泣師怪問之至曰我小未能榮養使老父不免勤苦師甚異之年十四遊太學遇嵇康于學寫石經徘徊視之不能去請問姓名康曰年少何以問耶曰觀君風器非常所以問耳康異而告之後乃亡到山陽求康不得而還又將遠學母禁之至遂佯狂走三五里輒追得之年十六遊鄴復與康相遇隨康還山陽改名浚字允元康每日鄉頭小而銳童子白黑分明有白起之風矣及康卒至詣魏興見太守張嗣宗甚被優遇嗣遠江夏相隨到滑

州欲因入吳而嗣宗卒乃向遼西而止戶焉初至與康兄子蕃友善及將遠適乃與蕃書叙離并陳其志至身長七尺四寸論議精辯有縱橫才氣遼西舉郡計吏到洛與父相遇時母已亡父欲令其宦立弗之告仍戒以不歸至乃還遼西幽州三辟部從事斷九獄見稱精審太康中以良吏赴洛方知母亡初至自耻士伍欲以官學立名期于榮養既而其志不就號憤慟哭流血而卒時年三十七

公孫鳳字子鸞上谷人也隱于昌黎之九城山谷冬衣單布寢土牀夏則并食于器停令腐敗然後食彈琴吟咏陶

然自得

元張昇字伯高其先定州人徙盧龍幼警敏過人既長力學工文辭至元二十九年薦授將仕郎翰林國史院編修官預修世祖實錄陞應奉翰林文字尋陞修撰歷典文署令遷太常博士成宗崩大臣承中旨議奉徽號饗宗廟昇曰在典故凡有事于宗廟必書嗣皇帝名今將何書議遂寢武宗卽位議躬祀禮昇據經引古參酌時宜以對帝嘉納之至大初改太常寺爲太常禮儀院郎除昇爲判官久之外補知汝寧府民有告寄束書于某家者踰三年取閱

有禁書一編且記里中大家姓名下昇亟呼吏焚其書曰妄言誣民且再更赦矣勿論同列懼皆引起旣而事聞廷議謂昇脫姦軌遣使窮問卒無跡可指乃坐奪俸二月歷江西行省左右司郎中除紹興路總管大德至大間越大饑疫民死者殆半賦稅鹽課責吏胥代納吏並緣爲姦昇爲證于簿籍白行省蠲之前守有爲江淞行省叅知政事者爭代者祿米有隙欲內之罪移平江歲輸海運糧布囊三萬俾紹興製如數民苦之更數守謂歲例如此置弗問昇言麻非越土所生海漕實吳郡事于越無與章上卒

元平府志 卷之二十一  
李  
罷之歷湖北道廉訪使江南行臺治書侍御史召爲參議  
中書省事改樞密院判官尋復中書參議至治二年又出  
爲河東道廉訪使未行拜治書侍御史明年出爲淮西道  
廉訪使泰定二年拜陝西行省參知政事加中奉大夫尋  
遷遼東道廉訪使屬永平大水民多捐瘠昇請發海道糧  
十八萬石鈔五萬緡以賑饑民且蠲其歲賦朝廷從之民  
得全活者衆明年召拜侍御史天曆初出爲山東道廉訪  
使踰年召爲太禧院副使兼奉贊神御殿事除河南省左  
丞復遷淮西道廉訪使上書乞致仕順二年復起爲集

賢侍講學士文宗眷待甚隆元統二年順帝卽位首詔在  
廷者艾訪問治道昇條上時所宜先者十事尋兼經筵官  
廷試進士特命昇讀卷事已告省先墓明年以奎章閣大  
學士資善大夫知經筵事召賜上尊趣就職昇以疾辭命  
郡月給祿半以終其身至正元年卒年八十一贈資德大  
夫河南等處行中書省左丞諡文憲

黃贊江西臨江人父均道延佑間求仕京師留贊江南時  
贊幼及長聞父再娶居永平乃徃省之至父已歿其婦挾  
貲更嫁居樂亭贊求見拒不納贊曰吾來省父不幸父歿

幸示墓所得奉骸骨歸足矣忍利遺財耶後母竟不見其  
母弟憐之與偕求墓所又弗得贊日夜悲苦禱于神一夕  
夢一老以杖指墓處曰見片磚卽可得明日卽其地求之  
果得啓棺携父骨歸

明管珍字席之江南長洲人家世理學品行高邁邑人韓  
僉憲原善令吳時物色之延歸教授子弟郡人師事之者  
甚衆珍之教先大節而後文藝日擊時事亟謀南歸至沙  
流河寄詩與其徒云沙流河口笛聲哀插羽飛塵匹馬來  
東望遙憐二三子幾人安坐讀書臺庚午城陷人服其

先見云

王元輔字玉鉉江南興化人隨父宦遊永平愛風土淳厚  
遂家焉元輔姿性過人補郡庠弟子員每試冠軍家貧授  
徒養親曲盡誠孝郡人韓令尹應奎負人倫鑒識妻以女  
元輔不愛美飾韓女卽練衣躬行儉素夫妻相敬如賓有  
鮑宣桓少君之風庚午歿于兵志業未遂士論惜之

徐碩字留侯江南嘉定人父工岐黃術遷永平碩師事管  
珍善摘詞兼精書法爲灤諸生父歿復入京遊公卿間詩  
文益進以疾逝碩有死友王復一竭力營殯且厚贍其妻

子碩可謂善于取友者矣

曹环字公粹江南上海人曾祖宗閔武宗時名御史以建言被謫直聲著聞环幼孤祖漢翹任永平簡校携之官甫弱冠補郡庠與會稽劉憲孟爲師友每試輒高等名藉甚漢翹解銀赴京師爲藏吏盜七白金貧無償惶怖歸里有司追責甚急怵身任之時同鄉董羽宸爲冢宰德珪先世厚贈始得完負憲孟連不第謀入太學怵舉所餘數百金爲贈無吝色陳王金嘉其孝義以女妻之

魯紹芳浙江餘姚人性恬澹積學有益諸萬曆初因祖戍山海就而相依乃設教關門以戴禮專業榆庠之有禮經自此始穆太守以此成進士後治禮者多出其門

朱國梓字鄧林遼東前屯人父梅嘗爲總戎國梓以部使司關務繼陞永平道僉事值寇陷京師赴關與總戎舉兵復仇比事成奉身而退僑寓關北石門寨山中菽水養母以琴書自娛甘爲隱君子焉

國朝趙廷臣字君隣奉天鐵嶺人明末寄居山海性至孝父歿三年獨居不入帷室爲人持正有經濟才國朝以明經入仕歷官兵部尙書總督浙江軍務

陳培基字心田遼陽人由選貢知山西遼州致政歸崇禎  
中寄居永平二十餘年禮節自持國初特起順天府尹  
時故明積習豪強肆橫以執法忤當事謫知海州尋轉刑  
部郎遷延安知府以循良稱陞江南海防副使卒於官猶  
子永吉爲江寧令有聲於時

王御世字開泰山西澤州人爲諸生每試冠軍數困棘闈  
肄業太學值幾東更定鹽法臺臣高公權鹽馮公疏請設  
綱增引順治庚子認商永平性敦厚尚義凡急公排難之  
舉畢力爲之無矜吝色長子業宏國生仲業偉庚戌武

進士季業隆乙卯武舉孫謙吉以明經筮太谷訓綽有祖  
風曾孫基由澤庠貢端重嗜學能以和厚處時盤錯累世  
僑寓北平無忝先德

傅以德字克昭浙江仁和人任俠好遊足跡幾遍九州所  
歷多題咏探親盧龍遂家焉負才不羣數爲鉅公延聘叅  
贊幕府入手千金立盡嘗因知交急難挺身辯雪遇事不  
憚解紛亦不容人過故常取嫉於人當事皆重其品

姚士圭字時六江南桐城人博識長詩文澤州守倫可大  
延致永平所至多題詠膾炙人口

方技

藝成而下亦足以見道伯樂相馬庖丁解牛以及盧扁之醫秋之奕僚之丸擅名厥世皆號國能唯茲爲故塞地荒略弗及事淫巧則罕所見稱然多能鄙事由不試故爾塵埃中固不無小智絕倫者

明顏欽昌黎人善醫洪武初年詔選入院授醫官以院屬掌之相傳八世孫顏有孚猶世厥官

趙楷樂亭人邑諸生少聰敏得麻衣訣然不欲以術售撫寧翟中丞鵬林居楷望見輒語人曰翟當起重用第不終

耳亡何起至大司馬總督六鎮遭阨王司徒好問不偶意鬱然楷曰君當清貴可上卿無憂不第後果然又能自知休咎俱言如左券

劉冠河南儀封人祖浩從太祖取張士誠有偵功授都指揮不受願就醫隨徐武寧調理軍士遂家山海冠世其業爲醫不輕試藥餌預知吉凶時主政鄔公艱嗣寵姬多人內有娠者嘗以疾求診脈冠曰請以麪盤印手訖出盤冠曰此非病乃喜兆也主生男後果驗詹大司馬家居病痰一醫自京來邀冠相陪冠一見卽告曰馬曰亟送回此醫

公疾無恙司馬然而送之至潞河驛醫爲馬軼躡死預斷諸如此類號爲神醫

黃象奎江西贛州人原姓李名逢月領天啓辛酉鄉薦筮仕兩當令以土寇破城避跡至灤祝髮蕭寺有蔡生見而異之勸勉畜髮與共筆硯開館授徒撫寧名士多出其門奎遂於易精岐黃之術施藥濟人全活甚衆卒塋紫荆山下



仙釋

秦皇漢武皆求仙海上今猶近島有其駐蹕而仙終不可致况竺乾述苦空後其徒引事浮屠號爲善知識者類習貪嗔世法升座談空求其實行修證竟萬不得一流弊忘源自欺欺人深爲四民蠹持世者固不可無韓愈之卓議也二者似不應矜奇長惑然苟遇其人而不據實以著質焉愈滋惑矣故用循次及之至如韓湘子張果老原載昌志其言果老世傳在仙臺山後修煉至今呼爲張果老院石碾石房遺址

尚存按果老遺跡在在多有若此無明証第目爲仙蹟可矣莫必其爲果老也韓湘昔文公勉之學曰吾所學者非公所知傳湘爲愈侄及韓滂墓誌乃退之自作自稱叔祖愈滂兄湘湘又爲其姪孫今昌邑西山石上影想像指爲湘子影是又因文公而附會之大率好事者爲之也俱不可以傳信茲不復載

金玉川子姓王氏失其名在灤州長寧店西建庵尸解莫知所在後有人嶺南見焉

元白雲子姓王氏失其名初居灤州西山因鮮卑金吾元祥邁別號如意野老住持昌黎道者山性警敏洞悉禪機嘗著蓮花經叙及註釋叙成佛前祝曰某愚昧恐不能闡發大道如文可傳碎而復合乃剪撒之須臾微風鼓湊如故一字不亂衆皆異之遂刊傳

卦和尚居府東陽山庵娶八妻皆死其壽百六十歲人以爲採補延年能前知言禍福如神凡訪者或城或莊方出戶卽知之呼妻曰老伴快作飯有幾人來訪未幾大呼曰再添米又有二人來訪少頃果然八月十五日有劫盜至先期呼山下莊客伏庵側聞磬聲各敲銅鐵器驚之遂解

散又一日知盜來自避庵後高處靜坐益盈擔歸至庵下  
百步許迷失道盡一夜力週庵四圍日出若有人拘者齊  
至卦前視之各盜如夢醒遂叩頭流血卦慰以善言陳利  
害各還物于故處而去

以上二條  
未詳世次

沈環撫寧深河堡人幼得仙術言禍福多奇中相傳于嘉  
靖年元宵日與妻弟某騎木凳騰空跨海往蓬萊縣看燈  
環半夜即回遺妻弟彼處丐食而歸呼吸導引後不知所  
終

### 永平府志卷之二十一終

帥請住持長寧觀闡玄教至元二年賜號廣德真人

淨聰乃東溟宋氏幼削髮爲僧遊清水興國寺師藹公頗  
多解悟于是遍歷叢林探華嚴金剛奧旨後于雲峰得訣  
始歸構庵不出至元乙卯入定諸沙門爲造浮屠有月泉  
老衲訪道清溪爲聰作銘後至明成化初塔裂啓之止舍  
利二三存焉

明楊不語灤西人性淳實甘澹泊寡言笑幼出爲僧明初  
時棲祥雲島古刹在灤岸寥寥無村落楊益苦戒嘗寂然  
竟日初不哆口講談人呼爲楊不語亦特信其淳實未之

奇後徃徃見有二虎來卧寺門不語汲水飲之虎馴不加  
害始知有行至宣德間百歲餘化

馬真一自稱河南人年一百八十餘歲昔在華山學道崇  
禎初年來入廣寧居北鎮廟採蘑菇拾野菜爲食時大旱  
經略袁公崇煥曾使人致至祈雨次日果雨但語言顛狂  
舉止疎放袁怪之目爲妖妄羈遲山海遇關憲梁公廷棟  
尤加親洽與談休咎皆應講經論藝剖抉如流飲食不拘  
葷素取足而止詼諧之中徃徃皆成讖兆踪跡無常人不  
能測後不知所之

